



臨野堂集




天籟時鳴小大者和正
去戊辰秋而誌
樂何
玉樵先生
詩情
臨野堂集



吳江鈕玉樵著

臨野堂集

詩餘



臨野堂集序



天下惟實浮於名者一時無赫
之譽而傳之久而愈光其名
浮於實者反是夫名生于人知
自淺陋者之急於求知輕自銜
鬻也於是大雅之士耻之抱其

所有深藏固蓄不屑與悠々泛々者爭短長而以俟夫真知獨契者此其自信者誠篤而期待者甚遙然天下大矣安必同時無相知而必求諸異日之子雲乎連城之璧韞櫝而藏何如置

諸五都之市以待人之賞識其有不賞責不在我矣玉樵鈕子與余生同里少同學知其才筆軼羣而性情孤迥凡世間文士所為者皆優為之且覃精潛思以造其工而未嘗稍自表襮其

以選拔入成均也操觚之士輻
輳國門各挾所長以求人知而
玉樵居其間粥粥若無能者稠
人廣會每一篇出未嘗不探驪
得珠使人自失然卷而懷之如弗
及公卿中有真賞者或延致之

贄卷呈身則有所不屑以故人
知之者希而君亦未嘗以著作
自命有索觀其詩文者輒遜謝
不工余曰此非謙也傲也以為
世人無足知我也迨既服官連
宰三縣而政暇輒讀書纂言益

脩舊業不廢此非好學深思中
有獨得而能然乎今歲余遊廣
州君在高明忽緘其生平著述
屬余論定余竊幸君之傲少減
而以余為粗能知君也受而卒
讀多往年所未見者大抵詩章

綺拔而雋永一篇中必有沉思
警語造微詣極言簡指深繹之
殊有餘味諸體雜文各有理趣
匠心獨運非苟作者而余尤愛
其四六駢體綜經緯史索隱鉤
深取材必新使事必奧精切典

雅不纖不靡披之雲錦爛然按
之意義簡遠即連珠尺牘斷章
片語亦多雋雅可味蓋以選體
為骨而澤以徐庾之藻采文質
相宣有典有則視今之以四六
名家專尚風華色澤者相去遠

甚而時譽常在彼而不在此宜
君之俯視一切卷舌而不談也非
直詩文而已君之作宰刻意為
廉吏操行堅苦矚然不淄所至
多異政民歌思之而君亦不求
人知曰吾行吾意而已要譽沽

名不忍為也嗚呼舉世滔滔利
名所在趨之如鶩而君澹泊寧
靜始終不渝縱其文辭不甚工
猶足傳世而况卓然成一家言
乎君即無意問世為子弟者宜
速梓行以廣其傳世寧無賞奇

音耽真味者毋曰知希我貴也
康熙己卯仲冬同學弟潘耒撰



臨野堂文集

總目

卷一

賦

卷三

啟

卷五

序

卷七

祭文

行狀

卷二

啟

卷四

序

卷六

記

傳



卷八

題跋引讚說銘

卷九

外篇

卷十

雜言

臨野堂文集卷

賦

秋悲賦

吳江鈕 琇玉樵著



維玉衡之旋指兮乃躔序夫凜秋重雲凝而黯黹
兮驚飈集而颼颼寒林靜而亭臯晚爽籟發而烟
景浮瑟瑟兮梧桐金井娟娟兮楊柳銅溝斯時也
青女司晨清風戒寒孤劍失意客子衣單酒酣日
落居人閨掩抱疴者尚卧茂陵銜冤者不歸梁苑
於是江南少年孤坐蘭館攬翠裘而未御歌白紵

而猶緩左擊玉甌右操銀管傾遐恨於鳳毫陳庶
情于瑤簡爾其鄴中上客洛下名賢陳思好士珥
筆華軒輿輪徐動夜詣後園珠露沾衣銀漢流天
見槁葉之微脫望皓魄之空懸雁字沉衡陽之浦
離人阻木蘭之船客遊倦兮萬里故鄉望兮渺然
積思風雨寄恨雲烟若夫漢將防邊孤軍遠度關
塞蕭條山川回互風捲寒沙雲平古樹埃火息而
啼鴉獵鷹歸而走兔苜蓿高兮宛馬肥蒲萄醉兮
燕姬寤吟笳瀚海之天戰骨青蕪之路刁斗連雲
弓刀飲露雄心憤薄迴皇四顧豈功成猶未召兮

應奸人之內妒恐年歲其將迫兮慨封侯之已暮
至如秦宮八子珠樓晚箏漢家良娣綠綺新聲蘭
薰未絕寶枕初橫翠華過兮香塵杳絲綦寂兮蒼
苔生畫梁空兮笑歸燕玉階淨兮坐流螢雕欄鸚
鵡語銀綆轆轤鳴御文茵之鬱燠置紈扇之淒清
維溫涼之異宐知新故之代更君恩兮不再妾恨
兮徒盈或有中散哀琴賓王幽鞞身繫北闕妻子
滿獄輕塵入戶飛蓬斷日赤髮宵行青燐晝哭庭
咽悲蟬舍止妖鵬雨載塗兮淒淒風墮林兮蔌蔌
問叢桂于故山馳羈魂以相逐占肅殺之在金詎

胥靡之可贖非時危蹈于禍機乃才高繫于名梏
悔不戒乎履霜早遂終其初服一旦魂斷愁縈枯
蠲况乃五陵豪族六郡良家曾來幽巷本號仙娃
長辭鳳閣投迹龍沙鄣亭衰樹驛路疎花暮埃點
今畫屐曉霧漬兮香莎忽薄寒之中人送落月之
西斜當旅舍以授衣橫玉筋于蟬紗歎一去兮不
復還寄孤夢兮在天涯別有赤壁文人潯江司馬
商婦琵琶細君魚鮓叩清商浮玉竿擊桂櫂剪蘭
拖星落征蓬岸無行者雲寺鐘遙邨危報夜別浦
則漁艇迷離遠市則酒旗低亞蒼波無極青山如

寫念天地之悠悠終愁殷而懽寡何人生之有盡
乃長勤于大化攬衣俯仰愴然淚下又若柴桑荒
徑黃花滿籬武昌南樓明月淒其少陵野老風烟
漢陂上京羈宦鱸膾蓴絲莫不感慄慄而懷辛睹
蕭瑟以興悲乃爲之歌曰橘下洞庭兮楓冷吳江
芙蓉零落兮草綠三湘百蟲就蟄兮蛟龍遜藏旣
動靜之有期兮亦枯菀之有常願與時而偕適兮
獨縱心以徜徉

亦園賦

亦園非園也歲在丙寅侍讀尹公典權湖口除

其署之隙地結宇三楹盆卉籠禽周乎其外操
簡而進余曰是亦可園也請先生賦之以榮江
山之觀遂點筆爲亦園賦

維黃輿之效奇忽吳楚之中坳點匡廬以結峰導
彭蠡以滙澤集千檣于空明倚孤城于深碧峙天
塹之巖關因設險而樹戟若夫石韻雙鐘鄉依五
柳橋偃虹飛浦旋蛟走夢來分風之僊詩載停雲
之叟橫今古于荒途遡江山而尚友疇作鎮于名
區闢溟濛于巨手迺者珥貂國望繡虎朝英問年
則三十公輔貯才則八九洞庭辭鳳池以握節鼓

雀舫而建旌弛漢酤兮勿亟衡夏石兮何平吏有
乘冰之立客無載愁之行鶴言堂靜香伴人清爰
擇隙以疏基復芟蕪以拓武布雁柱于重櫟奮翬
簷于迴廡椽無采而貌新牆不雕而制古一洲草
色遠欲侵簾半嶺雲光近能窺戶維時徑開碧蘚
幕啟紅蓮劔抽蕙直珠紉蘭圓榴染裙兮非妒竹
墜粉兮逾堅別有舞到牕雞歌來籠鳥彩分鳳而
文多慧過鸚而語巧雀自喜于階馴鷗無驚于波
浩矧屢值夫公餘洵足資其幽討當其圭侈日緩
絃報風薰綠村浮兮鏡曉紫瀾動兮穀曛屋置林

臨野堂集 卷一 四
端帶危松而倚壁帆歸天際逐高鴻而出雲瘦鳥
臨沙勢懸若接怒濤雜雨響定猶聞至乃月挂纖
鈎波搖素練起鴉點于前林來鐘聲于隔岸迷離
漁火低隱碧烟歷亂渚星倒流銀漢時方際夫朱
陽景朝殊而夕變况雪後與花初豈易窮乎壯觀
于焉屏騶騎延鴻賓一旗鬪茗千絲擷蓴莫愁之
曲薦旣醉之篇陳坐薤葉以分題舒牋粉膩貫楊
枝而命矢釋箠膠勻志非期乎玩物理仍愜乎字
人觀夫構舫歐齋披榛謝屐憂未絕于邊籌娛或
偏于墅奕何萃勝於茲園固目遇而心獲樹蔥蒨

以待餐石璣瓏以藉席願剪水兮半江將攜歸兮
狂客

蜀葵賦

玉溪之澄金岫之明中有隱吏擁書面城引華蓮
以挹秀竹商芝以掇英緬河陽之雅化羅嘉卉於
中庭於是覆綠沈扉垂朱壓榭日永麥秋風薰槐
夏梅吟何遜已零落于簷前菊對陶潛尚徘徊于
籬下維茲葵之吐艷羣暘傾而露瀉爰揣稱其芬
菲揮霞光于清暇當夫凌霜植早緼火培深修莖
抽於乍暖茂葉湧于多陰高不踰丈低亦侔尋蠹

亭亭其離立紛冪冪其交侵恍僊都之集珮儼王
會之合琛颺翠旌之舄奕樹絳節之斌森迨乎疊
萼勻敷分苞競坼妍似薜而常榮弱非蒲之可藉
鶯領圍紅檀心暈碧玉纍臺而九重錦成林而五
色疑才子之降落城類墨卿之臨芝室燦織漢之
雕章絢夢江之彩筆爾其蘊隆占序翕翫書辰薜
瘁懸門之幄苔銷曳壁之裊榭舒裙而已縐護展
黛而還顰何挺枝之蓊鬱乃布蔭之續麟克庇根
于晴昊竟固本于焦旻拳受贖而諫楚睢忘脅而
謨秦觀小草之有智能無歎乎斯人至乃揚葩瓊

澁之間擢穎綺疏之側馳暉則弱線添長躋影則
端圭表直高曦東射奮翠的以相迎圓曜西頽廻
丹蕤而並仄洵有照兮必隨曾無時之偶忒莘負
鼎而道孚渭浮璜而勳翊苟傾心以作忠庶靡慙
其芳德載稽葵族實繁有叢猗儺合沓種別名同
蕪城悲夫井廢漆室怨其園空潘叟閒居味永馨
于含露劉郎重到咏逸態于搖風匪藥欄之足看
僅菹豆之堪克此則杜宇偕稱來原自蜀月支久
別號亦爲戎旣披景以娛目遂托物而喻衷邈矣
靈源尙欲求夫六合爛焉官舍又奚累于三公

西樵山賦

峇堯江上遠彙二禺之靈縹緲雲中近樹五羊之障環其表者沃野逶迤浸其內者幽泉滉瀆珠璣萬斛澗復澗以相輸茵苔一叢峰與峰而相向瞻茲名岫唯羅浮之與同儷彼神丘何蓬壺之足讓爾其谿呀以爲洞也徹兮如剖豈試劍而忽開廓其有容亦尋源而可入斜成倚蓋堪畱對奕之仙徐出迴波若待流觴之客爾其竊崇以爲巖也貫穿暗竇玲瓏九曲之珠散亂斑文燦爛千秋之錦巋然積鐵立壁壘於重陰蔚矣怪松偃虬龍于絕

頂爾其盤紆以爲磴也仄徑緣毫陶氏之藍輿欲仆懸崖拾級謝家之蠟屐爲窮惆悵老藤飲猿並絕脚蹶峻阪翔鳥前通爾其鬻沸以爲池也疎雲出月影墜銀蟾旭日生煙光搖寶鴨芙蓉隔岸遙聞禪子之鐘楊柳垂門頻見漁人之筏若夫邨密鱗如岡平砥似處處薰風家家春雨名借蜀鵲種分顧渚連畦則碧展一旗共塢則丹舒萬葉乃有韶年弱姬冶遊佳士携籠塍間藉茵樹裏香飄石鼎戶傳烹雪之方艷發金樽人羨堆霞之里雖異卉彌谷而實繁嘉稻盈疇而莫紀維瑞草之與名

臨野堂集 卷一 七
花有非他山之所得而擬者矣緬閔暇之盛朝追
英賢于在昔方霍退休之年陳湛引歸之日支頤
朝爽啓林牖以延青曳杖晚曛駐雲亭而浮白永
寤歌于澗槃早栖遲於泉石於斯時也賓友聲同
生徒景附鶴蓋盈間珠綦克路乃闢重關乃營別
墅暢以眺遠之臺廣以庇寒之廡卧北牖而夢羲
軒集西園而談鄒魯翠凌斷壁補以講堂紅結飛
樓環之藝圃聿新風月之觀實肇林塘之主詎其
巖壑不改典型已亾華屋無存曲徑就荒沒蘚碑
於殘隴蝕蟲字於頽墻登高者歎逝望古者懷芳

奠先民之有作慨故址之茫茫尙欲遡淳泓以求
墨沼依滄嶼而問書倉是則富貴有時而盡而無
窮者澤人之勲業淑世之文章寧不與茲山共其
靈長也哉亂曰七十二峯奠神臯兮三十二泉沃
土以爲膏兮海國三樵夫孰與大科之高兮

臨野堂文集卷一終

臨野堂文集卷二

吳江鈕 琇玉樵著



啟

爲吳師母乞米布啟

蓋聞元禮生前東漢爭孔融之謁彥升身後西華
發劉峻之悲交以存沒異情事爲古今同慨是以
故人之感銘舊于庾山寡婦之悲慟懷于潘岳嚴
墓吳南村夫子玉山早萎金盃長塵史絕筆于魯
麟賦空樓于遼鶴鱣堂夜燭帳無立雪之人蒿里
晨煙墓有陳芻之客痛夫門東索飯貧亾杜甫之

小男窓北弄琴弱似蔡邕之幼女未畢尚平之嫁
竟絕伯道之祧維吾師母爰及二女食貧無悔茹
苦能貞田非文通半頃之田屋僅元亮百椽之屋
豈意戊戌之歲又延回祿之災孔里蕪原僑宮焦
土蔣生三逕猿鶴皆灰孫子一庭松蘭俱燼於是
顛連誰告漂泊何依欲就食西山則蕨弟薇兄憊
矣叔齊之室欲寄居東里則蜩妻螬母傷哉仲子
之家自此展轉九遷酸辛六載二孤一寡兩地三
居影不得以吊形骨無由而聚肉風霜機杼子母
則絡緯難通蓬梗關河姊妹則棗梨遙隔而且室

無樵婢門乏奚童負曝鎌蔬科頭運甓帶霜緼火
龜手擔薪縫淚影于雙眸春破半窓之雨搗泣聲
于十指秋勞四壁之燈斜陽鳴不斷之蟬未聞夏
麥落月飛無依之鵲不見冬衣甌虛陶母之炊豐
年亦菜裙絕馬家之練寒日嘗絺綉等同遊馬鄭
之門皆在張陳之列雖七十人之內亦有簞瓢而
三千子之中寧無騎駟昔日龍門之士往時絳帳
之賓或蠹粟之遺或縷絲之獻聊足資乎炊玉庶
有補乎懸鶉斗尺之謠未敢陳之吾黨釜庾之請
是所告於同人

吟園偶集啟

桃花源外漁人之城郭已非桂樹山中醉客之衣
冠猶是春來秋去幾虛玄度琴尊水遠天長每想
巨源風月米舍人之不作豈能畫裏常逢裴處士
之相知唯有詩中暫識良辰易逝勝會難遭聊尋
蓮社之遊足紀竹溪之樂吟來八斗雲封載酒之
船飛到雙鳧雨洗問花之屐青草入惠連之夢則
聯咏池塘者不可無人白衣過元亮之門則分題
松菊者何須是主一觴已足儉倣蘭亭四韻不成
罰依金谷

請雪厂上人啟

摩竭玄城八正之門嘗啟莎羅淨土五行之軌可
憑是以曜慧日於康衢則漆燈夜曉蔭法雲于樂
國則火岫晨涼倘玉甌之猶陳豈金輪之未轉雖
貫花清淨將彼岸獨證無邊而悟石慈悲必此域
同歸有覺伏惟雪公心空物外道妙人間威光直
解疑狐神力已馴醉象向以濟川演乘傳戒寶于
雲林今則禹穴探奇建智幢於香地故知蠲埃離
穢道無取乎糝糠然念拯溺救焚事必先乎桑梓
茲啟松陵古剎麻水遺宮名仍明慶之名境卽圓

通之境三花逕冷秋生黃葉而閉關雙樹庭空風
掃白雲而畱榻珠林豈容久寂貝葉尚賴重宣琇
等秦刼餘灰莊園剩夢慾河難息塵岳易崇唯是
鶴想故山終惜道林之一去卽此蓮開新社還期
慧遠之再來伏期法軌斯臨玄風不逃回不舟之
棹而惠濟迷津懸非鏡之臺而鑑窮幽界木樨香
矣雁聲帶銀杖以遄飛秋草萋然月影印木杯而
竟渡俯登莊座垂賜慈顏爰設香幢式迎杖履

謝仲岷山圖書便面啟

竊以石產青田鏤以重雲之法材呈紫蓋劉爲半

月之形駕彼齊紈等茲漢玉使其入冠軍之幕終
當利于袖中苟非乞刺史之書誰復求之篋內豈
意吟頌素筆篆錫丹縑署字題名預爲龜顧虎蟠
之製浮涼滌暑卽在猿驚雁落之行三筆六詩霧
垂而泉湧二文八體鐵畫與銀鈎佩之敢不銘心
展且未能釋手恐元規之塵起自足障風歎季子
之籛空何當懷綬

爲徐司寇與慕中丞求婚啟

紫氣西來鳳卜啟長祥之席青陽南駐燕禱徵元
吉之辰絲薦五紋繫彩纓于禮幄墨成九子合芳

牘于僊輅惟冀永世以同昌式眷嘉姻而有慶恭
惟某官星巖擢德璜瀨鍾神吞雲夢于文河飛電
霜于武庫城則遠依鶉爵地則近接簪亭山繞崆
峒學授廣成之奧水通涇渭量涵叔度之弘錦縣
數年澤洽盈隄花柳銀毫一紙威深橫海鯨鯢眷
重楓宸鎮移鶴市旬宣方甸樹江淮千里之屏藩
綱紀儲胥掌吳楚二郊之鎖鑰元規樓中嘯咏座
惟風月相親仲淹關內經營胸有甲兵足用九重
赤紱遙分節鉞之司七郡蒼生共托雨膏之蔭渚
遵衮繡龍旂誕紀元勲室茂芝蘭驥子悉稱哲嗣

在玉親家彩鈴授瑞鏤管標英雙玉爲環世顯華
陰之德五雲作字家承安石之風振藻槐街名旋
騰于藻榜揚鑣桂苑籍早著于蟾宮才調爭雄獨
高珠幹文章繼武寧數鳳毛某尊水微宗鹿城下
士世忝參軍之裔素以忠厚相貽業慚孝穆之傳
詎曰文華可尚維時季弟昔分蘭譜之榮亦越寒
廬今藉棠封之庇時從燕寢佇聽鴻猷闢畫戟之
重闈龍丘每煩候吏頒瑤緘於遠檄鹿門嘗接郵
筒過蒙降禮之殷遂忘上交之瀆御車有子執鞭
尚慚訓于元方繞膝維孫啖餅忽垂情于太尉爰

臨野堂集 卷二 五
從詹尹卜兩姓之吉言因乞蹇修訂百年之嘉會
懼薦蘿之附柏妄冀緣高喜蓬藿之生麻彌懷扶
直幼孫男未諳六七僅嫺梨棗之儀令孫女初識
之無卽受輦絲之訓文通四義慧聲遠遜神童譽
擅五長淑配必速博士鴛鴦七十錦字初成杵臼
一雙玉烟自暖禮陳不腆纁幣用以告虔義取相
求金音期乎允諾欣占冰語祇布葶情

爲徐司寇與王司農求婚啟

日麗瓊田嘉禮薦雙題之玉雲翔錦幄和鳴占金
翼之凰嬾婉繫纓好遂申乎累葉氤氳合牘介寶

藉乎高禴爰卜展慶之辰式致告虔之贄恭惟某
官嶽精鍾德緯耀垂文羅夢鳥于神崖握靈蛇于
智府一水叶弘農之策巷著烏衣三公兆魏國之
槐庭圍綠樹倚龍江而建名族臨桂閣而啟鴻基
帶佩金魚早列筭班上客冠施鐵柱旋標柏里賢
聲進封事于阜囊樞機地軸出持籌于驄馬經緯
天倉碩望則弁冕中州弘詞則丹青元化實惟令
嗣誕振華宗階下三珠早茂上林之植雲間一鷲
先傳閭苑之鳴儼齋親翁揚鑣芳苑濯秀清流席
帽初來簪筆松軒之側褐衣纔脫掄才棘院之中

獻以繼羲世號風流獨擅祐能生旦人知台衮相
仍某系出南州家依北郭棲遲一第讓達聞于少
年濩落微官憶飛騰于往歲猶記華亭密邇嘗從
谷水盤桓締縞紵之未歡厠敦槃之高會每聆雄
辯坐起虹霓時挹古懷誼聯金石典型廿年推重
交契再世彌殷竹館芳林手寫德柔詞賦瑣闥椽
燭目驚仲寶才華黍一日之知敢謂和凝傳鉢訂
百年之好寧止元禮通家生子未似仲謀竊慙家
訓有孫或如靈運弗墜門風不揣蓬華之卑妄冀
薦蘿之附爰從冰客以乞金言維是寒門得婚高

閔孫男德淑六齡繞膝老親愛切于含飴令長孫
女七誠受書內則禮嫻於湘藻問郎同里近依孔
雀屏前得婦弱齡早見綵繩月下愧乏奇童之譽
坐據胡床尚賴大家之風範成絳帳自此紅絲引
幔永調錦瑟之絃紫玉攜簫長佇彩鸞之駕敬陳
不腆禮器授自先人允結同諧德音求於君子
儼齋爲東海門下士是時偶有薊蕙故棲遲一
聯及竹館芳林數語皆司寇手自增入

爲徐司寇答王中丞婚啟

霞光麗錦織紫陌之祥烟雁柱調絃報黃花之令

節書傳彩牘舊門高蔭夫三槐幣薦纁奩嘉禮下
頒乎雙璧敢因寵賚用答徽芳恭惟某官和鍾玉
律采授金庭建神標而氣欲抒虹賈文勇而才堪
撒燭烏衣門第久徵淮水之祥占鶴氅風流實本
緱山之仙系化魚石畔橫劍氣于三江折桂堂前
追珠光于二俊大曆湘靈之作蘂榜名高長安杜
曲之遊筍班望重旋以賜麻而登水部因之懸鑑
而掌文衡含雞舌之遺香風行髦士收麟蹄之逸
駿化溢蓬門綵筆掄才不止滕王一序絳幃傳學
無非泰伯五經攬勝盡乎匡廬拜章歸乎薛澗鳳

纏繞滕早貽叔武之青箱龍檢馳音仍進子明之
赤紱某駒王舊裔麟子微宗幼卽工詞業有慚于
先世晚而獲第名獨後于故人每因河朔英豪謬
登文苑未似廣陵博雅久玷史班維是名邦實鄰
敝里向忝少陵祖姑之戚誼洽葭莩繼從蘭亭昆
弟之遊情伸縞紵尚憶乙未之歲同盟二酉之堂
葯芷迎舟曾載琴尊南浦珊瑚架筆還題風月西
園仕各殊方情猶同體金臺邂逅仍不鄙乎寒微
玉曰贈貽復欲聯之姻好緣絲蘿之舊睦介以冰
言念菅蒯之末交申之月牘校書左掖芳箴未奏

乎茂先坦腹東牀遠器早逢乎逸少令嗣諾成鳳
尾將踰象勺之年小女訓習鞶絲僅解組紉之事
珠林標樹寧傍蒹葭柳絮裁吟尚慚芝蕙書無曹
大家之誠女謬廁詞臣識非晏同叔之知人翻逢
佳壻機中錦字初試鴛紋樓上瓊簫長諧鳳卜路
近萬年之樹式賁星軺箋成五朶之雲兼臨瑤札
永以爲好承筐敬納夫千純罄無不宐奉帝允型
乎萬石

賀顧可亭三月三日舉子啟

臨項子之國梅歲甫週嗣杜母之徽鴻名肇起種

花纔滿已茁蘭芽馴雉欲飛乍投燕彩喜是咏璋
之慶恰于飲禊之辰記時則良月初鈞問序則吉
爰再索雙鸞簫裏吹來大小珠聲七雁琴邊攜到
後先玉影繡閣之繩宐頌作錦郊之襁負風成卽
今日浮盞懸鈴瑞叶鳳肩才子看明年提戈取卽
貴徵虎額通侯愧乏玉果之貽敬致綺端之獻

答張澄城啟

星懸河際朱輪公子之家書受橋邊黃石仙人之
畧廼者訕鸞棲之德振采關中兼之秉燭照之才
分輝境外地繁當借允惟尹子之相宐民靜爲歌

孰是鄮侯之可繼弟倦遊冀北十載留燕薄宦甬南一身依洛白雲虛望已無捧檄之歡朱芾濫膺彌有試鉛之懼所幸風流匪遠邀芳規於曳柳之前緯畫旣周竊美錦于種花之後忘顧形而自穢喜循轍以靡愆虺馬修途愧未將乎一羽瑤槭旅舍辱先至乎雙魚豫切葵傾附伸蕪報

謝朱高陵惠筭墨啟

當繡紱初懸之後又芳莢欲佩之辰未將芹櫨翻奉瑤書假以錫直之榮心籌益展示其知玄之守腹籍逾增所當借彼石君待發青鏤之夢抄維雲

子還成赤羽之吟感莫罄于銀毫惠已隆于玉案敬登二賚附謝羣珍

答段守府啟

百斛騰文九苞颺采遡世勲於沂水忠笏猶傳振家學于芮城清廬可式揮毫而烟雲落紙久成磨盾之才運籌而尊俎生風早赴翹關之選因杼雄畧遂掇巍科甫開玉帳正仰華杖策之年旋縮銀符卽好時封侯之地攬貂裘於芳夜應聞一范輿謠倚蓮鍰於高秋允作三秦屏蔽弟謬膺芻牧竊慕雅歌遙瞻嘯月之樓神依森衛近接建牙之鎮

臨野堂集 卷二
輝溢荒圻未效弩驅驚先頒乎尺素用將韋獻謹
少展其芟私欣寶校之初臨蔭逢大樹愧紵衣之
末契儀等微芹

臨野堂文集卷二終

臨野堂文集卷三

啟

答李子德內翰啟

吳江鈕 琇玉樵著



琇聞函關下吏攀牛駕而乞言魯郡少年叩龍門
而投刺迎爲國士非無平棘之箏號以經師獨有
盱江之鐸凡此賢稱史牒悉皆系出仙根况乎九
曲東流黃懸日下三峯南湧翠繞雲中地屢發乎
雅音天特疏其井野田家泉石勝址相依种氏琴
尊貞標可望璜浮在水非止鍾漱藝之才芝採惟

山亦每毓捐榮之客恭惟先生考亭學正同谷吟
高敏捷千篇金薤垂謫仙之筆牢籠百氏珊瑚集
秘監之門兼乃旁涉孫吳畱邊籌於劔幕繼而深
探河洛闡理奧於書幃維時玉壘旣平石渠始闢
鴻詞之綸甫下鸚薦之牘頻投處士星多悉懸藜
閣伊人水遠盡達瀛洲先生則易筮匪躬勉從人
爵詩歌有母切念天倫應制三章洗千載科名之
陋陳情一表驚九霄袞冕之尊爰降殊恩竟還初
服羣公滾滾誰能接軌而來大宇寥寥僅見披帷
斯在還山屏貴此真今日長源署吏稱高寧數當

年孟節秀政疎馴雉性溺雕蟲才未敏于八叉氣
盡靡于五斗再沾微祿徒銜逮親捧檄之悲一寄
荒疆難覩對客漉巾之樂幸茲彭衙故地近接星
堂乘彼臘月餘辰遶臻錦里雪殘重澗若失修途
鴉集孤村忽忘窮晷登歐陽之第始知海內文章
覩皇甫之顏自別人間姓字爰蒙掃榻更遇張筵
綺席珠霏寒銷永漏銀燈花燦春發深盃惜踰宿
而旋歸慚淡旬而繼出乍來玉樹闕然倒屣之迎
載錫瑤械率爾空函之答榮逾享帝懼切臨冰瞻
仰高輝唯覺心隨威鳳循環佳詠便同手握靈蛇

看白沙翠竹之非遙尚容置驛待素月紅罍之復
御莫吝嗣音

又

柳舒梅綻春事方濃樗散蒲零駒光已邁一官拓
落弧矢之志未酬三載棲遲松菊之思徒切所幸
近獲依仁時聞析義恍蓬池之如接漑以詞源欣
芝宇之載親示之行矩式瞻關學益愧吳蒙乃者
莪詩久廢每感降于庚寅馬齒漸加更懼生于甲
子不謂兕觥下錫鴻筆遄頒旣纁篋之陸離復彩
毫之稠疊謝家玉樹遙賁山中緱氏瑤笙旋聞天

上此函關尹喜乍逢雲笈相貽卽勾漏葛洪難與
丹砂金購者也敬受佳篇永存陋室懸藜之照附
完隆幣預占元公衮繡之華俟十日而叩龍門藉
歸緘而通鯉素

又

流光似羽微秩空沾旅髻爲絲舊山遠別發狂吟
于詩草未期丁卯之傳寄痛飲于騷經又歷庚寅
之降驚逢青鳥恍接蓬池欣見朱霞爛盈葦室惟
是杏耕伊始野歎罄如苔役無休民歌勞止三星
映留愧看南極之懸二月鬻絲忍見東皇之笑是

以杜門求過攬絃懷慙幽酒雖攜堂下屏稱觥之
兕河冰旣泮階前辭入饌之魚亦何意于秩筵乃
忽邀夫明賜然而贈之白雪同獲瑞於豐年錫以
素絲并示箴其姘節珠生字裏如來函谷之貽鯨
起緘中敢效杜陵之拒敬承三物感切五中

謝李子德惠筆筴啟

雪隱墻腰陽回隴首良書敷賁荒署騰輝先生學
積琳瑯德涵葑菲乃者冗詞哇響旣蒙弁以甫言
至于卮語猥談亦復緯之郢點被裸人以文繡華
過星垂授朦叟以金篦豁同霧撥屢荷指南之誨
逾增硯北之慙燕覽瑤華兼膺綺篋揮綠沉而弗
惜如從鳳凰池上之遊鐫白暗以相貽允誌鸚鵡
粒前之感

答許山濤內翰啟

曩者分擅槐市接席芝堂荏苒星移倉皇雨絕問
地則三千里而遙計時則二十年之久命實不猶
霄谿遂判仰瞻仙署顧影增慙乃先生不遺塵吏
垂念笠交手頒溫諭副以稠施東籬菊餌未教彭
澤先輸北門羽觴反出蓬山特賜尊而善下誼實
邁於古人賤不使疎榮已深於窮谷謹因遙翰肅

謝洪慈朱炎負曝豈酬考履之殷碧冷擷絲式報
借籌之雅

答關蒲城啟

瑞質標崧英源遡雒藻珠榜下飄錦組於盛年荀
玉班中剖銅符于大邑氏出神仙之系學惟道德
千言家承忠孝之傳志在春秋一卷遷鶯出谷尚
依雙闕雲高攜鶴入關漸覺三峯日近維茲鸞翔
舊府原稱桑落名邦奈其吏習飢疲兼以民爭壽
幻苟非懸之夏日使玩者畏焉卽欲扇以春風亦
善者懼矣况當饑饉薦臻之日視粟猶珠抑且荏

苻未靖之方化鋤爲梃必烈如東里不辭鑄鼎之
勞迨信似西門始識投巫之勇蓋治在因乎其俗
更絃之理宜先而任必俟乎其人騎竹之迎已亟
弟吳市漫郎燕臺狂客始也曳絲項國試鉛曾入
珂鄉今則縮墨彭衙分照還依粟岫事莫慚于越
狙猥遇投艱才實拙于借籌偶來承乏濡遲三月
政未逮于飲羊蕭瑟兩門民豈孚于徙木所懼螟
棲之从逾深霓望之殷伏願膏雨隨車逝矣雙鳧
之發薰風催棹飄然一葦之從看稻成孫獲歲歲
屢豐之樂憑藜扶老慰人人何暮之思碧羽上林

蒙賚辭于初雁紅亭古堠用答意于前騶錦字遠
將缶音滋惕瞻芝伊邇傾藿靡涯

答吳白水啟

虎林霧蔚鰲嶺風搏名久媿於六安秩屢加於三
命優游文圃遠追季重才華磊落草廬共仰伯清
節概于是雙鳧化履爰分魏闕之符一鶴隨車適
受彭衙之組溯洄故里原止帶水可通邂逅他邦
若待腰章而合佇迎榮旆旋屆芳春惠公非遲自
哂事道以事人之拙廉來何暮爭傳望君如望歲
之殷弟五年守土祇羸峴首豐碑三月攝官忽墮

萊蕪清醜未讀縱囚之論深愧歐陽竟罹議吏之
威空悲司馬思歸有賦旣似葉以俱飄承乏無期
乃及瓜而未代方謂鄰交以道將依處守之季任
詎知敵起于舟翻遇擠排之林甫服誇狐白曾忘
背棺之愚文昧鉛黃唯恃腹刀之險再索環而不
應三騰篋以無休彭澤雖貧未是逋租之吏柳州
已逝偏來下石之人犀足照淵幸當路不因投杼
蛾常射影恐此生或中含沙所爲遙瞻芝蓋念切
朝饑唯祈速慰篠簞光開晝蔀義高孫宰庶杜甫
盡室能安政善尹君卽薛恭奉身獲退驚聞青鳥

銜尺素以先頒肅報紅牋杼寸丹而莫罄佳占東
氣已見鴻休慶得南朋曷勝燕喜

潘太母張孺人七袞徵詩啟

蓋聞貞石蟠松百尺之陰彌茂繁霜輓竹千齡之
節逾高茶或如飴在潔珩璜之佩繪雖後素終彰
黼黻之華是以婉孌鸞儀固常生於崇閣崢嶸鶴
算亦每見於寒閨啟彼琅函爰有駐髮怡顏之術
披茲彤史非無緯蕭畫荻之賢恭惟潘母張太孺
人天墜一星曾依柳畔家鄰千里常住尊邊幼卽
嫺詩更習組紉之教長而織素還工緝緝之方閨

中號以鍼神林下欽其蕙質維時出湘藻釜捧匱
以對才人歸挽鹿車結禱而偕君子舉案則良偶
之雙髻方青登堂則慈親之半頭已白脫珥璫以
資夕誦經繡琴尊恤絡緯以備晨炊拮据井臼警
鷄樹柵旣小物之代籌鬪茗繙書亦寸陰之共惜
豈期芹水騷壇頻聞狎主瓊樓仙籙遽召修文乍
止鵬于承塵竟凋鷄于比翼薰風苔徑祇剩籃輿
涼月蓬牕尚畱綵筆孺人則呼云莫贖臨穴思從
稱曰未亡磨笄誓決奉尊嫜之慈命勉視藐孤返
先人之做廬黯依孀閣篝燈合績筐傾虛牖之霜

繡佛同齋蔬摘小園之雨行隨鳩杖溫清頻煩凭
侍藤輪旨甘黽勉及夫耄耄大年孝貞奇節彰乎
藻闡旌自楓宸頒鐵畫於中涓灑懸禁楩賜金錢
于內府屹監巍坊實賴顯揚之識仍資營建之謀
既而鯉泉波冷玉樹陰繁九熊辛苦聰啟雙珠截
髭從容譽成兩駿璧公藝林翔步縮綬而達皇衢
廉升槐市蜚英聯鑣而稱國器維飲椒之日久斯
啖蔗之思長蓋孺人之始也以婦職而殫子職爲
櫛沐之女宗繼也以母儀而擅師儀爲吟批之家
督宐其風霜顏渥金石神堅陪宴西池如玉卮之

獨秀分光南極與寶婺而齊輝茲者歲逢豕渡月
報榴開當太母設悅之辰正長君影纓之會紀靈
鳥於圖籥自古猶稀集彩鳳於階除于今爲盛寧
辭揆藻用佐鳴璈伏冀雲霄碩彥琬琰雄才或錫
難老之章珠投燕市或賡忘憂之曲霞照虹亭將
見管榘翡翠永流璫箱玉局之芳牋拂芙蓉遠發
瑤水鴻天之響

爲謝大理賀張臬憲啟

天上瑞星人中奇傑焚香畫省譽獨盛於望卽聯
步薇垣勲屢彰於分職旋膺特簡廼建榮綏九天

使節初入函關萬里荒雲卽開華嶽熬波出素裕
管筴於窮簷列駟成花通漢郵於絕塞旣舉廢而
振疲復愛賢而樂善座揮珠玉無時空文舉之尊
門接章縫不惜倒中郎之屣而且義踰指廩恩逮
貽餐事事周知起羣枯於洪澤人人滿願登衆感
於熙臺以是黃雀徵環綠蛇輸綬三槐甫植枝已
凌霄雙鳳偕飛羽偏輝日當一門之慶集適五載
之績成爰奉恩綸遂躋憲府蓋眷茲西上爭言君
子平政以紓聖主之憂而式是南邦尚賴哲人慎
刑以恤小人之命行見棠垂芟舍狴犴無鳴草鞠

園扉桁楊欲卧法明星紀永消鄒獄之寃德種雲
曹共羨于門之大某一介牽絲十年佐幕量移廷
尉之末班濫竊春明之微祿然而枌社桑田原畱
秦隴老親稚子猶寄皖城向來棲托曾久沾轅戟
之光今此瞻依復近接閣鈴之響慈實承於兩地
感何異於二天紫泥煥爛預占玉鉉之升翠葆翩
翻乍喜麟符之錫雖識韓無路望切懸旌乃慕呂
有懷役思執御申芹私于一縷敢比乘韋寓鳧藻
于十行還憑尺素

爲丁丑庶常請閣學韓慕廬啟

星精集緯標紫府之英華嶽瑞效靈開丹丘之黼
黻五百龍飛之歲名世相逢三千鷺振之辰景行
在望管搖翡翠冷然之致凌風鈎發珊瑚皜乎之
光映日因通家而瞻塵後用修牘以代韋先恭惟
某官斗山碩望冰玉清姿邈世澤於高閎孝廉繩
武承家傳於舊學詩禮趨庭爰搜討夫六經更貫
穿乎百氏蘊潔淨精微之業抒雄深雅健之才甫
冠鴻都遂超棘院射策方傳第一祥驚五色之雲
題名復見無雙貴湧三都之紙寓先機於筆陣識
極滇池懸獨鑒於冰衡羣空冀野出臨史館折衷

玉筍之班入侍經筵迪德金華之殿乃猶性恬珪
組興逸林泉請休沐於瀛洲寄閔情於茂苑髮未
絲而還里童孺知迂叟之名心似錦而成文禽鳥
入醉翁之記然而賢聲益懋帝眷彌殷遠錫溫綸
仍膺崇秩聚山川於腕下手握黃圖羅兵甲於胷
中目營青海無不副茲鉅典抽以秘思文章則起
衰自任續八家之緒領袖歐蘇風度則立懦爲懷
追四相之踪提衡范富朝端早推國士海隅咸仰
人師某等睹元和之登第卽鷄壇宿素亦誦鴻詞
聞崇政之說書雖鳳輦尊嚴常稱績學喜從遊於

玉署獲奉教於墨林已踰紅杏之期適迨素商之節遙頒奎璧還從設讌西園近接蓬壺尚藉盍簪東閣伏願鶴蓋儼臨貂輪賁止芝蘭香永四筵起君子之風笙瑟音和三爵稱大夫之雅銀鈎燦爛敏知刻蠟吟成金粟飄颻雄待霏珠談集恭馳鄙臆綴卮語而葵傾欣迓芳儀眄騶行而鵠俟

乞書小啟

琇也百年已半心負閔居三仕未休名慚大隱直非展氏曾爲一去之士師拙似潘生復作再來之邑吏將辭燕市忽逢塞雁飛初欲適端州正值嶺

梅開後念生平旅跡都寄長安而往昔窮途每依良友蘭臺鳳閣非無少年昆弟之交詩屐酒壚尚有短褐風塵之客同遊感慨之鄉豈乏別離之恨因貽素帙用乞雕章倘鴻篇製由燕許不須定係贈言或佳翰灑自鍾王何必更題賤字請止三晷爲期遂以十行見錫藏諸藤篋儼秘監之追從緡以牙籤恍故人之披對此日負琴載鶴如行攜合浦之珠他年望菊瞻松卽歸代鬱林之石

送扶搖叔筆筒啟

老叔已踰磻溪垂釣之年猶擁伏生授經之席尚

稽當日杏壇別畱佳話足徵他時海屋無限奇齡
謹製梨筒奉貽絳帳輪囷於外唯理則文空洞其
中以容爲德毛生卓立何須翡翠之牀管子橫陳
卽是珊瑚之架濶可周乎墨海高僅亞於硯山攜
自仙家永伴穀城黃石傳諸賢裔亦稱叔武青箱
聊因炎國雙魚更益文房一寶

賀平陽王郡守啟

位望圭璋勲華鐘鼎遡燕貽于碩裔久著烏衣被
棠蔭于名邦屢崇朱紱民情若照兩成都之治行
齊稱世德相遺三京兆之風流獨擅初飛鳧舄繼

畫熊車道寄絃歌輿頌徧畱乎螭碣香生姓字御
書時紀乎雲屏因簡北闕之股肱用作南州之藩
翰月高赤壁清攜一鶴之裝風靜黃梅榮晉雙幡
之秩寵綸載錫綵鳳爰飛重鎮旋膺篠簜競擁膏
腴絳沃正尹張樹績之鄉襟帶河汾卽衛霍封侯
之國旣化行于五馬况德懋于三槐吏號神明羣
服飲冰之潔政成保障無煩衛戟之嚴將見郡舍
鸞棲布休聞于晉水唐州之外行俟星垣珠照升
良弼于殷衡姬袞之間某陋慙樗質拙滯丸封向
者地邇赤畿夙奉玉霏之訓今茲望懸青漢難求

縵汲之方然弱葦可杭問道則未云河廣而高鴻
欲繫欵門則彌覺塵遙唯時際乎陽秋將庇邀乎
大厦敢因乘韋之獻式展葵傾并抒寸草之懷肅
馳燕賀

石制臺壽啟

葆智萃仁經文緯武指顧江山之險鞏屏障于南
天提衡岳牧之尊肅袞裳于北闕保釐則東西二
陝畢公原異姓之懿親鎮撫則內外兩河寇侯實
興朝之碩輔野分牛女控五嶺之上游地接蓬壺
攬十洲之勝槩近者紅葉發艷黃菊蜚英鶴翥瑤

天迎幔亭而集佩籌添碧海開幕府以懸弧珠浦
花田家獻無疆之頌荔波龍洞人稱方至之歌蓋
高嶽降靈五百年而鍾申甫而大椿植榦八千歲
以作春秋由先覺而擅先知盛矣生民之傑以多
福而臻多壽誠哉行地之仙某三托名區兩爲屬
吏鈍同鉛試寒金蟬棲風雨滿城愧一吟之未就
烟霞徧野喜百穀之將登幸藉庇于樾陰遂自忘
其樗廢貞非元亮尚安室內簞瓢遇不長房豈識
雲中鷄犬望瑤池而路迴湖颺館而神依遙瞻走
馬之臺未隨寶轡竊慕餐桃之讌願進丹砂

張府尊中秋啟

名邁虹高政齊霜肅恩膏遠渥灑灑玉露之零智
府空澄皓皓金精之照當此百穀告成香生桂子
兼以七星入望峰對蓮花曳畫彩之雙旌旣治軍
而講武舞散雲之五馬復省斂而弛征城郭笙歌
人獻有年之瑞樓臺燈火家呈不夜之輝瑤堦散
影共披尹甫清風寶劍流光遙識庾公長嘯飛觴
綺席問月明來自何時點筆晶宮賦秋聲成于此
夕某賤同葵扇未解乘時潔遜冰壺安能照物凜
求廉飲惟知止水爲心倖托仙槎尚覬登雲有路

繞南鳥於錦樹徒懷烈士之吟挹北斗于銀河願
進賢人之酒

李巡道中秋啟

繡斧建屏牙幢行部提衡四郡統臨萬石之尊鎖
鑰一方獨攬七峰之勝維茲炎徼已解煩苛矧是
良辰更逢昭朗初改趙家烈日桐引露以如珠遙
鄰楚國雄風桂飄花而爲粟塵清寶戶蓉鏡同圓
雲湧冰輪龍門獨麗爰值厭厭之夜應開秩秩之
筵揮銀鈎于豐屋誰知北海情豪吹玉管于明河
唯有西崑體艷某自愧吳蒙每思荀御乘槎直上

尚迷牛渚之津擲杖遙空未識霓裳之曲幸抱關
而稱隱吏獲受微言喜迎楫而遇仙才側聞燦論
因有懷於問月非無望于停雲仰靈鑑之澄清守
惟知潔念恩珠之浩蕩報豈云奢

魯藩臺中秋啟

化洽十州政平九賦星精垂彩高臨問石之臺風
德廻瀾遠澈毓珠之浦握樞機而轉軸長依北斗
銀潢作藩翰而建屏重見南交銅柱况復時當月
盛歲屬賓興遙遙彩屋列笙鶴以迓星槎冉冉冰
輪聯奎璧而開雲路玉觴飛處正逢庾傅登樓金

粟飄時獨掌歐公鎖院迨乎三珥呈祥八騫斂照
琳瑯環座桃李盈門援蟾蜍而升月斯徵大人造
命之權吟蟋蟀而俟秋已成聖主得賢之頌某困
守一經途旣窮於折桂拙從三仕心唯切於思尊
幸絳帳之相依尚青袍之未解紫雲飄渺每企望
於貝闕珠宮黃卷棲遲最傾懷于雕龍繡虎嘉辰
旣邁鉅典初成自安飲露之蟬無由移樹尚咏食
萍之鹿願佐承筐

張臬臺中秋啟

望軼雲曹秩均繡史備五辭而聽棘冰鏡同明準

二柄以著書霜飈並肅繼蓋公之清淨道自協于
長生追雋氏之平反德已徵其多福况復海屋添
籌而後瑣闈持斧以還珠胎出水影漾銀河桂粟
飄雲香添金掌合十州而登壽域領羣仙控鶴之
遊臨三島而蒞文壇成多士攀龍之遇迢遙天際
孰能隨萬里之槎照耀人間莫不仰千秋之鑑某
智慚鼠獄仁恤雞竿讀書而兼講律曾聞士在哀
矜薄斂而繼省刑未見民能寧壹守星巖之介石
願與同貞挹珠海之恩波非求自潤灑露零而歌
有譽靈輪滿而頌無疆地不隔於武彝神馳彩屋

官雖同于勾漏餽闕丹砂用奉芹修兼陳桃獻

李道臺壽啟

望重龍門居高麟里通藝七十子而後守藏室而
號儒宗名世五百年之間依舊樹而生仙裔題綵
毫於芙蓉鏡下莫及巍科擁繡節于菡萏峰前正
當韶歲維星移斗渚之辰卽岳降芝庭之會端臨
列郡甘惟酌廉讓之泉慶衍長齡瑞復集羅浮之
鳥明河垂練讌比瑤池綺席盍簪頌來銀管况寶
成乎田峻亦錦報乎天孫躋公堂而祝嘏爾風七
月之詩量滄海而添籌蓬島十洲之誌他年宰相

蚤占噉芋之長源此日仙人重觀摘桃之太白某
秩黍紆朱心勞瞻紫家雖吳市敢邀隱吏之名尹
不秦關偏獲受經之遇仰崇霄而分芳露徧潤千
家依泰嶽而挹清風滿攜雙袖自憐蒙莊竊祿僅
安蝴蝶之棲已從勾漏祈年願覓丹砂而獻望風
志喜術尚遜于鳧飛傾日抒誠神獨殷于葵向

迎彭撫院啟

潔貯冰心剛操鐵筆垣中六載忠必告而善必陳
河上三年坐不乘而行不蓋維勞勲之茂著遂清
節之升聞策蹇衛以出淮雲泛扁舟而司黔臬于

公陰德原無意于駟馬高車雋氏平刑實有關於
民生國脉以茲橫江鎖鑰遙授九重爾乃薄海翰
屏旋開百粵在中在外聲譽軼乎富韓自西自東
經猷侔乎畢召兩賢易地正聖主之哲以知人一
柱擎天唯君子爲端能表物竊念炎陬矧多秕政
兵以緝盜而盜卽由兵何怪潢池之不靖賈以獲
官而官仍爲賈止憂寶藏之未充嗾待賄而後消
奸商因謀貼餉錢入市而莫售貧民奚自求金此
皆叢弊于窮簷當已縈懷于智府扶藜耆老久引
領乎雲霓分檄庶僚亟求資乎陶範某冗瑣末員

顛連薄命三歷仕而不已兩閱歲而無成黍稷端
溪廉寧投硯寄家吳市拙每思尊目瞻泰岱之儼
臨心擬葵忱而獨向職因羈乎守土謁尚阻乎拜
塵伏願樽俎風清旌麾日麗指蓬瀛而建幕立珠
江萬里之長城綜山海而成書懸梅嶺千秋之明
鑑

答蘇廣文啟

珠海耆英龍巖華胄追家聲于秘監雅號多聞遡
世緒于荀仙夙稱博籍言詩言禮出立庭之訓以
授人樹表樹坊本循牆之銘而造士階前瓊幹積

玉流輝林下鳳毛含苞颺彩淑成驥子榮達蟾宮
業治一經并富五車書籍文貽三管已高駟馬門
閭爰奉鸞綸因登虎席昔寓室于武城原曾子舊
遊之地今分齋於安定卽胡公新著之規左圖右
編戶接鼓鐘之響朝經暮史人增俎豆之容弟拙
似潘安衰如燭武攜琴獨理常殷兄事之懷借鑑
相觀尚賴師資之益欣芝顏之在望驚瑤翰之先
頒碧映一池闢頽林而日暖紅飄三徑臨矍圃而
風清敢詠素絲敬迎朱紱

臨野堂集卷三終

臨野堂文集卷四

序

黃圭庵詩文集序

余之與吳愧庵先生遊也生八年矣輒嗜古作茅
焦張良諸論間以呈愧庵愧庵心善之以詩贈有
曰爾言寧激發吾道本光明又曰何當來小友塊
壘覺消平愧庵固余師事者不自嚴而友余余敢
友愧庵哉厥後從南邨夫子受論語尚書及制義
夫子于愧庵爲季父故得時時過從愧庵愧庵又

吳江鈕 琇玉樵著



心喜之以爲受吾叔業之愈吾業也今夫子往矣
愧庵又被難其妻子流離冀北老母年且七十餘
髮垂垂白覆雙耳倚徙蓬華間天涯日斷旅櫬浪
泊而閨中婦殉義國門外幼孫被羈縲走遼海數
千里道旦夕之膳待命閭里嗚呼悲矣夫以愧庵
之孝於親持七尺耒耕南山之田收數斗粟易于
市得甘脆令妻子肅盤卮而進之豈宜有是耶愧
庵之所以厄于人者余知之矣以其好行仁義而
自力于古也好行仁義則所履正所履正則不毀
其志以從於邪自力于古則出入于往昔聖賢之

言而以發其感憤無聊之意憫時嫉俗往往有之
噫此固愧庵之所答於天者而豈人之所欲者乎
龍門奇士也而服賤刑孟堅碩儒也而桎梏以死
機雲二俊也而駢首戮之數子者當其閉門拒跡
立說著書思有所自見於世非爲夫傷膚髮斷肢
體之謀也而禍旋及之後之好仁義而自力于古
者思矣雖然豈愧庵之心哉富貴止于其身年壽
有時而盡未若好仁義而力古者之無窮則人之
所以厄愧庵而卽天之所以厚愧庵也圭庵黃子
爲門下高弟其所爲詩古文詞皆淵源于愧庵不

負所學愧庵有傳人矣癸卯孟冬過畢子宿宮齋
出黃子集讀之并讀愧庵之序是集者時坐小樓
夜將午風雨颯沓從西牕來孤燈熒熒泫然想見
其爲人因念人之欲全身保妻子棄仁義而自絕
于天者鮮不以愧庵爲口實求如吾黃子圭庵之
以仁義自信而不惑於人也烏可得哉

醒石上人詩集序

騷雅之雋以風流自賞恬淑之才以澹泊爲高其
居養之所移者殊也浪仙苦吟三經年而得句廷
筠捷獲八叉手而成章其才情之所昭者一也若

有脫畧塵區之外牢籠藝圃之間客至孤峯則白
雲待掃琴張靜夜則明月入懷居之適也而所養
自淳蓮花作社則高詠先成柿葉滿庵則新書欲
徧才之敏也而其情又逸斯固古今之曠軌而通
人之所兼者矣慨自四始之風永息五言之城已
堙魏晉以來麗深而失理宋元之際腐極而流淫
唯貞曆之揆華與弘正之敦古可謂殊代追踪異
朝合響迄于今茲道與時易人隨世遷石渠閣上
羣集饑烏銅馬門前叢生秀麥雉壇之風雅未敢
重揚石室之英華豈堪復問哉余也覓路迷津入

桃源而放艇棲心玄籙攀珠樹而挂瓢交遊之餘
忽逢羅遠詩篇之作近見湯休如醒石上人者固
其裔也夫綺麗緣情應思累德風花呈態或恐生
魔然而形骸等土木之觀性情當陶鑄之暇慧業
所著細帙斯盈亦嘗見夫籠天薰焰車馬如流匝
地險巖網羅何密則梵宇寒雲閔房春草未必不
侈于銅龍金谷也廣陵調絕綠水誰鳴華亭路遙
白鶴空唳則虎踪說偈驢背行吟未必不賢于銀
管玉題也烟霞者逆旅之戲具文章者大塊之謗
書或戶戶醬瓿而騰譽蘭臺或人人菴臼而埋名

芝谷則木觚貯字玉井沉簡未必不壽于太學碑
雒陽楮也况夫五乘深叅三空獨悟其所以發雪
山之秘藏揮靈鷲之上辯者更有進于此乎甲辰
蓮開日題于海棠窩中

海棠緣序

昔者龍門攄憤始開紀事之源楚澤埋憂實著言
情之藪蘭皋人遠亦有麗詞石室書殘非無變響
是以虞初小說垂百種而非繁子夜哀歌歷四時
而不斷香生莫返曾聞花上盈盈雲想爲緣如見
鹽中昔昔瑤臺易醒榮華悟槐國之虛錦襪難留

臨興堂集 卷四 四
歌吹感梨園之舊雁飛汾水淚沾李嶠之衣月冷
邗溝腸斷韋青之舫嗣後雕章間出妍唱爭傳或
情以悲生或事由幻顯會真蕭寺壁合雙文追賞
荷池釵分兩地樓中弱骨寄薄倖于紅裙亭畔幽
魂尋冥期于黃壤茲皆騁懷詼詭說本荒唐匠意
漂淫文過靡嫚尚乖立言之旨終成累德之篇若
乃金石交深流連師友閨幃遇蹇判絕姑嫜園土
授書痛吮萇弘之血空山阻雪饑餐左伯之糧魯
國中賓攜孤誓節荀家奉倩歎逝傷神苟其寫以
烏絲被之金縷又何俟歌來易水髮始衝冠鼓向

雍門淚將承睫也爰有蘇門華胄吳地騷人胸貯
雕龍面鎔冷鐵頑未同于鬣鬣望絕蓬山陋不解
于姮娥信窮藥榜眯目茫茫之隊九烈誰逢驚心
袞袞之塵三湘竟負時則俠能爲用義邁虬髯慈
足相依訓聞熊膽用是雪門獨立學就伊川鳳管
雙吹仙諧蕭史詎意數仍奇而不偶窮每送而頻
來才則多愁貧焉卽病溘先淑儷潘安仁之永悼
何堪零落故人鄭康成之舊遊安在悲難爲狀恨
且靡勝將搔首而叩帝閭天常自醉忽羈魂之逢
土伯地豈能靈悼此孤生等諸殘夢思盧充之再

合相貽宿世釵鈿羨丁令之重來復見舊時城郭
因以儷花之筆發其稜藻之才嚼徵含商曼聲流
乎檀板裁朱拈碧雅調叶乎珠喉所謂燕市傭工
無以逾其憤激雲陽過客未足喻此情痴者矣嗟
乎銀燭高烧空憶傾城之睡麟毫徐點難招香國
之魂花萎故枝人傷薄命斯有同慨烏得無言然
而芍藥欄前清平調未呈妃子琵琶曲裏鬱輪袍
莫進王孫孰令聽之誰爲讀者庶幾紅牙紫袖付
之旗亭名部之雙鬟白榜青簾助以司馬江州之
一泣焉爾

孫子商聲檀清綺之才稟孤峭之性所著海棠
緣傳奇蓋自道也予在京師寄索弁言遂敘而
歸之聞其每讀一過輒拍案稱知我者未幾竟
以抱憤溺死元伯之遇無期中散之調已絕念
之不禁潛然

鹽幕卽事序

古有執戟卽官世著扶疎之說彈琴州椽家傳蒼
叢之書若其運叶丕休猷成顯懿溯河清而獻頌
瞻雲縵以颺歌出入金閨布詞條于萬頃縱橫石
室垂筆露于千秋斷可知矣至於位不達才時方

絀命雲從未定乃當龍戰之朝星應將興忽在麟
傷之野則官云拓落遇客能嘲詩曰流離呼人如
袞固其宜也慨自炎精淪照仙葉摧芳萬騎烟屯
卧銅駝於棘裏五陵草沒出金盃於塵間紫塞冥
鴻亦有思鄉之感烏衣舊燕非無去國之悲旣而
雒水鼎遷燕山瑞輯銀床金埒歸豐沛之通侯圭
竇繩樞守義熙之貞士荒槐秋井影落空宮細柳
春江聲吞野老此故土之音猶操鍾子而窮途之
慟獨發阮公也哉東軒先生以瀛洲華選之英當
滄海潛移之日一家臘祭早鑿顏坏十載酒傭久

依梅市豈期九霄側席屢懸想蠋之交四岳張羅
並奏薦雄之牘翔鸞赴隴束帛填門然而義在辭
尊暫爲蒼生而出志無充詘終與黃石相期觀夫
左氏賦吳侈言煮海柳州問晉博喻傾星偶托墨
莊何妨鹽幕爰從休沐之暇悉杼藻績之工筆點
五言長城斯寄塵揮三語佳椽攸稱序達名都非
鬻才于皇甫牋辭記室已表意於元暉割螺岱之
遙青行車獨擁闕蜃樓之幻紫佩紱如遺於是迫
遂初心遡迴故里屏浮雲而弗貴抱明月而長終
道之將廢命也如何琇也牽絲南頓步屨東屯敬

求豹霧之廬因識龍文之裔厥有象賢不謏貽澤
發其緗簡示此珊瑚嗟乎松風栗里如披著作之
顏羅月夔門尚暎拾遺之宅張曲江遺文未泯請
看徐孺之碑馮敬通永恨何窮竊擬江淹之賦恭
疏卮語尚誌幽衷

竹逸園吟序

觀夫鑿坏依汝業不著于名山蜚藻遊睢義或虧
於甘節蓋立人之紀彰物之華二者斯兼曩賢罕
覩也磐石閣先生早履閔凶夙敦恭友廢莪集萼
篤性府以承家輯柳穿藜秀學山而震世初膺名

于桂籍卽息影于芸居維時鹿走秦原駝遷漢陌
堅城七十望鐵騎而瓜分壯士三千偃珠旗而鶴
化巷移王謝難求棲鷺之門隴起張陳爭下揭竿
之檄先生則心籌危圉獨守鄭陣手裂僞符不聞
王鵬旣而託蘆渡水遠泛孝廉之船披葛尋丘多
著流離之咏輕裝亾于越載愛子繫于鍾囚確乎
不磷擔焉靡痍逮乎赤眉長遁黃鉞遙臨始旋復
于荆衡仍棲遲于林壑四松如立頭消蜀客之霜
五柳相依心醉晉年之酒送人南浦或寫離憂坐
月西園每歌良讌碧雲檀板調更叶乎九宮丹藥

瑤函藝且窮夫六緯屣賢書者四十載枕鴻寶者
數萬言爰有文孫實維詞伯丐余素管弁此青緇
惜其蠹蝕羽陵灰飛劫火廣搜秘帳畧睹遺篇然
而崔顥一詩常垂江上姜夔數闋久著花間苟有
可傳奚庸求益嗟夫落紅渡口維鷄犬之已仙凝
碧池頭亦管絃之如夢學弗渝于杖朝之歲名復
發于繩祖之人所謂時窮而節茂身隱而文昭吾
何間然矣世有作者其尚鑒于茲編

顏媛芳在偶葉草序

蓋自媧皇煉石天始搗華媯后沾筠地能紀恨樓

中鳳太雲飛六琯之吹河上槎來星報七襄之織
嗣是攷仙踪于瑤笈閨閣爲多問慧業于芸編裙
笄特盛故班史伏經而降世傳授簡之賢衛書管
畫以還代擅臨池之譽瘦細籀之圍帶原屬纖腰
媚繡榻之懸針仍稱巨手今有才姝字云芳在聰
成天上徽著人間裔出名臣幼噉真卿之忠果配
偕君子長依茂叔之清蓮姊是令嫺彩腕則句聯
羣妹母爲道韞綺談則圍解諸郎遡夫粵嶠尋遊
迄于吳門結隱弱髻隨宦賡官閣之梅吟盛鬢相
莊記書帷之茗鬪璇璣互製題分響屨之家縞紵

交遺編寄印脂之友簪花妙格寫以烏絲杵月新
聲譜之紅豆疊近文楸之局殆將玳瑁千函攜同
錦瑟之絃寧止鴛鴦兩字爾其啼鶯坐柳聲到枕
而逾多夢蝶棲蘭香入鬟而彌永薤涼秋簟助惱
晨眠蠟盡冬檠替傾夕淚有懷望遠意最愴于哀
時無事登高語獨長于賦物詩城百雉築自夫人
筆陣千軍掃由娘子教鸚日暇兼畱贈妓之篇繡
佛工閒還補施尼之偈至乃慈親常隔仙侶暫離
使不達于明駝信或違于朱鯉梨花別院忽送遙
思燕子空梁會聞長歎麝鑪裊裊文盈側理之間

虬箭沈沈情罄赫蹠之上暮茲黃絹硯頻捧于樵
青假彼丹唇毫屢呵于樊素遠投記室驚咳唾之
珠生密授典籤快縹緗之錦積若夫露華拂檻調
絕深宮金縷提鞋事移往代微雨動畫簾之魄曉
風碎殘柳之心間發長謠多拈小令倚聲獨苦協
律偏精此又吹綿枝上無能儷彼閨情滴粉尊前
未足追其麗製者也然而命非諧俗才止供愁當
蒼鶩出地之年正青雀浮家之會烏衣巷改尚書
之棨戟都非綠野池平司理之琴尊安在兼以子
纔稱驥望千里而未歸女本名珠入重泉而不返

臨野堂集 卷四
宅荒杜甫但撫四松道遠秦嘉惟窺一鏡是則草
雖侵案寧解忘憂花總當牕焉能蠲忿芙蓉箋冷
粉漬淚以恒紅翡翠牀疎黛結眉而詎綠攬其著
作哀艷攸殊槩厥生平苑枯各異昔何沃若閉羅
綺兮如烟今乃淒其合鈿釵兮奚日葉寄浮生良
云偶矣以斯命草旨哉言乎聞諸陸弟將貽瘞玉
之銘請自何甥爰綴貫花之序

鶴沙草堂詩集序

兩丸烏兔丹霄無易盡之期八極鷗鵬赤甸有難
該之境茫茫宇宙逝者如斯納納乾坤遼哉莫及

苟其居同坐井跡淹跬步之間識金窺籠姿弄惟
房之裏則卑棲一曲動觸四隅旣鮮登陟之遐必
極見聞之陋响嘯奧簡未獲恣其討搜睢渙芳流
何由資其藻染是以謝公雙屐非止勞園禽池草
之魂杜老孤舟必幾閱巴火楚雷之域行之旣遠
言則能文我思古人亶其然矣今有隱侯哲裔笠
澤仙才夙具神姿遙來碧落早聞家訓小字青箱
比非歲而工文盡占遠器迨嚴親之出宰隨侍名
都放鶴梅坡非無東兗趨庭之什觀魚花港亦有
南昌遇餞之篇錦負一囊鳳凰在手雲書五朶琬

苑爲心旣而松嶺賦歸蓴溪伏處螢乾秋案委宛
探奇麥泛夏庭摩杪攻苦嘯或生而應虎孰與彈
冠泣每下而成珠偏逢按劍警三餘之枕惟見燈
青做十上之裘空餘貂黑於是東循郟國北叩燕
關西指匡廬南踰粵嶠寒江飛鷁郵記牙籤古道
鳴驄裝攜銀管爾乃皇居壯麗胄監斌森周覽鴻
都翔揚戚里高軒相接每邀上客題門漫刺未投
已致羣公倒屣移來寸跋蠟甫刻而吟安譜人么
絃雪欲飛而和寡帝京篇出何煩復賦三都公讌
詩成直可平驅七子至其落拓江湖流連林壑晨

征飄爾紀候館之鳴蛩宵夢淒然辨香林之語鐸
鷓鴣臺上憑吊雄圖鸚鵡洲邊寄懷薄命引盃看
劍每爲變徵之音倚月望雲不乏思鄉之咏大約
紀遊則州歷其五攬勝則岳望其三緇帙離離羅
千秋于筆底銀鈎爛爛彙萬象于毫端曠矣是編
洵其觀止嗟乎清新無敵僅見伊人儒雅吾師寧
無知己當時薛據曾登古調之科此日范雲莫失
忘年之友胸藏絕業旣大雅之攸存眼豁浮雲豈
長安之獨遠余也生原共里誼甚同懷奉杖將車
夙繼荀陳之好分袍假蓋兼稱管鮑之知出則狎

主騷壇入則偕游藝海自夫饑能驅我又違鱸膾
之鄉動必思君空寄梅花之夢幸來吳聘欣晤秦
山得於燕笑餘辰讀此鶴沙諸詠十年屢別綠髻
將摧千里忽逢青尊莫負念聞鷄之歲月能不傷
心看繡虎之英雄猶然屈首爰當春曉聽鶯之會
共把卷而舒懷因從酒闌拊缶之時遂濡毫而敘
意

莘野堂詩集序

大矣夏聲地是鸞翔之府悲哉秋氣時維桑落之
辰黯黯緇塵南鴻已斷羸羸素髮北斗何依爰辭

黜柳之邦偶息寓臬之跡笑登樓之鍾輻止挾青
箱懷題障之杜陵正逢紅樹粵有邵陽康子譽望
矜良儀形髯偉三年不見唯林雁之頻飛一日相
思忽牕梅之盡發竭來蹇衛戾止閉門披古錦而
囊開覩華牋之句滿攬其全帙如入端人莊士之
林喻厥幽懷不啻寡鵠哀猿之引因與擊尊咀咏
剪燭摩挲審厥緣情請爲敘意爾其盈車書籍授
自中郎負郭秫田遺由元亮聯五紋于繡管非無
棣萼之劉摹八體于銀鈎亦有竹林之阮奧通琬
琰購蕭字以名齋癖寄縹緗搜鴻文而置枕于是

論交畿輔極命風騷就學河汾與聞性道斜陽寺
壁題每過乎高軒微雪旌亭吟且邀夫勝侶登筵
揮灑早傳鸚鵡之名遇物流連遂擅鷓鴣之號至
若征途倚劍旅館聽雞歷鍾阜之逶迤度彘門之
寥寞秦淮浸月六朝金粉之鄉梁苑迷雲千騎霓
旌之路憶錦袍之往事祇剩漁舟問珠履之舊賓
但存屠肆所以班荆籍卉感慨之什爲多拊筑鳴
箏憑眺之篇斯積也然而陶鑄性情必待鍾神之
境發明耳目更資濟勝之材苟非身托高深未由
成其壯觀加以心遊今古迺悉達乎清音昔者向

君超曠以婚嫁渝期羊傅風流以勲名注慮星槎
取石虛聞博望之占雲嶺投書僅誌昌黎之勸茲
則奕奕故封山稱禹甸囂囂遐軌野樂莘耕飲對
靈源觴可浮之天上坐臨經瀆龍欲化于門前宐
其學藪渟泓燦桃花而並泛詞瀾浩瀚迅竹箭而
爭流矣况復引筇高掌睇髮華池凭絕壁而駐書
幃三窺菌蔭凌危梯而尋藥鼎十採璠琤削牘濡
毫接曦輪于咫尺盪胷決背渺陸海于銖苾又豈
若遊從林屋攀玉柱而猶遙夢到崑丘賦瑤臺而
未許哉嗟乎語足驚人不用求之謝眺才宜佐國

國朝堂集 卷四
何當召此馬周歎紫氣之未銷僊宮可望呼蒼霄
而莫應帝座誰通於此興言能無掩卷江湖獨往
余將挂隱吏之冠歲月靡涯子且藏名山之簡

戴氏家譜序

事之敦本錫類使前可追而後有承者其唯家之
譜牒乎然近世之言譜牒者余竊疑之其或門異
崔張胄殊褒鄂則往往于久不可考之裔遠不相
涉之宗援引附會以自高其姓氏至問其祖若父
之嘉行懿烈渺不記憶而骨肉近戚饑寒失所嫁
娶無所資者漠然若行路之人而已噫循流而忘

源敷枝而傷根豈古者立姓聚族之意哉康侯戴
公與予同官于豫各以攝邑事受代相得甚謹時
余兩先人尚無恙迎養在署戴公每過余輒憊焉
若有所慕且自悲者曰維君有親繫吾獨無也余
詢其故知其起家遼左從 章皇帝入定中原駐
軍粵西父母兄弟俱相繼殉國難以沒矣戴公治
沈丘有廉聲內擢奉常撫其季父之孤及兄所遺
女解裝割俸務憐其心親串故舊或遇猝變貧無
以存者不待其陳乞必先意調之於是戴公之譽
藉甚輦下而倬禮負恩自處于污者懼以其名聞

戴公之耳也夫余觀于戴氏之門其爲臣忠其爲
吏廉出捍牧圉則遇難不回入字子姓則施德無
倦雖傳不數世世不數人而卓卓可紀如此此何
俟珥七葉之貂佩五公之環乃卜其昌熾蕃衍哉
後之繩武而名登是冊者其亦可以油然而興矣
歲丁卯孟冬余服除來京戴公出爲西秦州牧於
其瀕行也適舉一子因喜而爲之序

玉海弟紀年詩序

壁光六驥非有待於戈迴海水三塵曾無勞於弩
息蓋境爲物化情以事遷而欲索響前林求形夙

鑑難已然而木斷石穿知焉則懼銖量黍積能欲
無忘是以候變鳴禽謝客發春草池塘之感而齡
踰走犢杜陵生秋風梨棗之思也維我次公實稱
玉友甫離蠟鳳之辰遂擅雕龍之譽始則侍隨彭
澤臘用義熙旣而適返羌村亂逢天寶於時顏坏
移照志銳編摩皋廡借陰蕪窮藻繪勝衣弱歲謁
博士於鱣堂釋屩盛年賦嘉賓於鹿野以茲言樂
蓋已兼三如可忘憂何妨滿百詎期閩海船還家
述去住吳門人隱世閱興亡忽棣萼之掩芳蘭芽
繼隕當橋林之墜蔭萱草旋凋貌是一身置黃輿

而若粟飄然兩髻入青鏡而爲絲用寫多愁悉成
長句嗟乎納納乾坤假形大塊颿颿歲月托象洪
鑪辭槐國而易榮觀能無歎逝追鳩車而懷陳迹
亦在知非題曰紀年意同惜日君而及此我則何
堪眺斜陽於西閣孰返桑榆扶殘醉於東山未忘
絲竹睹此珊瑚鈎裏卽藏記事之珠唱彼蟋蟀堂
中當念磨人之墨

璧合編自序

雲璈振響奏聾俗而無聞霞錦舒紋示瞽師而莫
覲無他授其所迷則神拒違其所嗜則道淦也慨

自四門勿闢途隘於制科六行不升典移於帖括
情田繇其顛倒菑圃因以凌夷甚則殿上持衡權
歸紫袖闈中揮翰神助青峯以致遇舛數奇才憎
命達淵雲墨妙難求溲粟之階李杜文芒終遜鬱
輪之曲嗟乎齊夫逐臭啜百晦之樹蘭漢士舉肥
歎雙蛾之寫黛是知收奇英于射策誤甚鴻離求
良弼於工詞茫如鵠刻不其然乎然而閉室雕輪
製適衢而齊轍指城辨鏗氣徹獄而干霄鄰德豈
孤友聲自應故矜其墨守則識昧薰蕕罄此澄思
則揆同符節在昔有聞於今猶信余也牽絲項國

西野堂集 卷四 二十七
遡絕學於伊川炙轂梁園想妍詞於司馬每從署
牒之隙屢傾授簡之誠彩鳳翩飛遙投夢裏神珠
宛轉並照懷間時則座置珊瑚手摹整曰擬昌黎
之矻矻發潛德而何幽乘彭澤之閒閒披奇文而
獨賞豈期物爲好聚情以類臻天遣星軺奉簡來
于日下人推冰鑑行部戾乎土中徧歷東郊儼臨
南頓音知流水遇綠綺而尤憐影照垂花入青銅
而益艷凡所推轂之彥悉爲貯籠之材銖兩能齊
芥針未爽陋非傳鉢偏符甲乙之名靈欲斷緱忽
合雌雄之氣此亦八紘之僅事十帖之偉觀矣邇

者居憂多暇羈旅始秋計日閱乎彌旬搜文獲夫
大衍弁云璧合蒼爾編成夫卞氏踵門罪反生于
懷璞蘭生睨柱價始發于連城離則兩傷合則並
美若其心迷蘭櫝碎垂棘而投淵目暗金篋蹴懸
藜而置廡玳瑁當道安問璠璣幸輟是編其無終
讀

白水縣志自序

通天下之大析而爲邑一邑之內山川原野終古
有常形而生息於山川經緯於原野者事以歲改
人以世移則必述往示來以備皇圖之載佇青史

之傳而志於是乎成故白水之爲邑其置於天下猶彈丸耳而志仍不可以已也雖然納形于鑑而憎貌之勇生取途于轍而泣岐之悲息志者非僅志其軌物名數爲也蓋怒然宐有深思焉視其境而土荒不治民流不歸凍餒之不甦奸宄之不戢必計其室家婦子思有以爲之所者而後知疆域戶口田賦之所以志也登其堂而政以賄成刑以殘逞保障之弛賓旅之困廩困之不以時發必徬徨惶杌甚愧于衷思有以去其愧庶無忝於厥位者而後知城署倉庫以及郵獄之所以志也入其

廟而見往聖昔賢與夫聰明正直之神籩豆陳于上鐘鼓奏于下盛服莊容以相對越必爲臣忠爲吏廉表節儀而振風雅思有以垂範當世遺愛後人者而後知官師選舉以及諸祀典之所以志也嗟乎墨者家于官蕙者囿于官而世之所謂才與良者汲汲維榮進之求傳舍其官而已思之弗暇其又奚志則是役之不能無待以成也久矣余至邑五載庚午辛未頻罹於災鉛槧之業輟而莫御壬申始有秋乃合取劉王兩家之言損益其舊蘇碣蠹編極於搜討三閱月而書成司訓兩宐張子

將謀付梓適余以攝蒲城事註誤落職去遂不果
繼余後者爲武林鶴亭吳公嗜學工辭凡有裨邑
政者詢之熟而籌之審其深于思者乎下車不踰
旬卽索余稿因以歸之而爲之序

觚賸自序

原夫天爲石補光乃麗乎三辰地以鰲勝力且維
乎四極蓮生嶽上巨靈運掌而山開烏走雲中后
羿彎弓而日落若其游神六合抗想千秋都非易
測之情實有難窮之理然則莊生齊物何得置北
溟而不談屈子離騷能無仰東皇而欲問乎况夫

鬼盈睽載易留語怪之文神降莘言史發興妖之
論杏壇書垂筆削辨六鷁之晝飛龍門事著興亾
誌一蛇之夜哭是知虞初小說非盡出於荒唐郭
氏遺經固無傷於典則也余也生雖已晚世不逮
夫嫻嬛思則靡涯心常傾夫蒼葭幼而就傳延吳
札於楓江長且服官謁徐陵於柏府初垂縞帶便
學長吟繼傍玉臺每聆新語入燕都而懷故國記
覽夢華登梁苑而晤名賢書攜行秘迨夫哀纏素
鞞貧典黑貂旅食三年不斷皋魚之淚宦歸千里
無餘劉寵之錢遊跡則雁池鳧渚閱歷偏賒行裝

則玉格貝編討搜獨富旣而聽雞函谷策馬蘆關
歎密法於秦灰欲辨怪哉之氣懷和聲於周鳳還
題吉了之名碑洞文章收諸綠笈橋山陵寢繪以
黃圖今則仍縮銀章更臨珠海鷓鴣啼處朱旗錦
石之鄉蝴蝶飛時丹竈羽衣之洞官逢鬪穀得虎
說于荒江語習媿偶成魚吟于蠻府粲花客至快
雄辯之當筵話兩人歸喜華賤之在篋遂乃傾觚
授簡抄以小胥因之別地稽時彙爲全帙言其大
畧蓋有三焉爾其簫斷吳門曲畱小海筑摧易水
歌起悲風嵇散揮絃廣陵之音欲絕潘邠閣筆重

陽之句無多苟非闡此嘉名誰復求之幽壤至乃
江頭孝女黃絹無傳塞外文姬青蛾莫贖簾窺燕
子新愁鎖夜月之樓門倚桃花舊笑憶春風之徑
維美昭乎繡管斯艷發乎香籤更若大夫觀止雅
擅多能君子至斯夙推博物疏不遺夫草木學遡
葩經註兼及乎蟲魚功期翼雅爰以資其考索非
止襲夫傳聞然而宇宙茫茫人如粟渺江河滾滾
世亦萍浮目不越于方隅每以常而爲怪心苟通
乎大造將何幻而非真念茲得失之林總歸陳迹
悟彼逝來之境庶得遐觀姑存此日瑣言豈曰珠

能記事倘附他年野史亦云稗以備官焉爾

弄酒餘閒集序

仰瞻蒼昊象著於星俯察黃輿名垂爲郡享其祿者不願膏粱入其鄉者如遊懷葛備矣哉其酒之爲德乎然而苦忠甘佞品顛由彰清聖濁賢風標各立苟非斟茲妙理何殊飢彼狂泉若夫湛湛文心珊珊僂骨沈冥十榼藝通紅杏之壇敏捷千言才擬青蓮之筆則吾友姚君竹友其人也爾其支分鳳閣華胄非遙家住鴛湖寒扉獨掩牀書連屋未逢問字之賓園柳聞禽祇獲聯吟之弟往來東

郭孤憤攸生出入北門殷憂莫告向九霄而欲問能無對以舉杯笑二豪之何知唯有行而荷鍾於焉長辭吳會遠陟燕臺存歷晉齊周流楚粵玉泉河畔每尋摩笛佳遊銀燭樹前屢邁盍簪良讌憑車徑唾已忘丞相之裊脫帽雄談直據將軍之座有時投筆著岑牟而號鼓師何處垂釣題虹霓而稱釣客至若運籌幕府磨盾戎軒感慨關河雷連烟月豪曾解帶指索銀瓶狂或披襟拓歌金戟矧玉山之將頽更彩毫之絕艷笙歌鼎沸拈四韻以先成劍舄紛馳緘百函而並發又如選勝探芳秉

簡藉卉語傳鸚鵡頻喚真真曲寫琵琶偶携小小
旗亭微雪遲聲徵名部雙鬢驛館穠花遠恨寄章
臺一闕解畫叉於旅壁盡付青帘抒詩錦於奚囊
半因紅友是皆藉樽壘以澆壘塊消麩蘖以合形
神蓋得趣於中而遊方之外者也塗泥軒冕惟曼
倩爲大隱之尤冰雪聰明必元亮有閒情之作古
云醉吟先生今其再覲已嗟乎君是謫仙尙待解
貂之侶余非歡伯常懷擊缶之英所謂伊人乃忽
遇風塵之表如斯高咏應長留天地之間

觚賸續編自序

斯人誰與世已滔滔此日不回年何冉冉悲虞翻
之骨相孤負明時老潘岳之鬢毛棲遲拙宦心如
鶴靜自忘冲舉之勞政與絃清亦鮮更張之擾翠
飛斷靄常迎城上羣峯紅點疎林最惜簾前永晝
倚床偃息神恂恍而若移凭几沉吟思紛綸而乍
起則有故人萬里文傳海國之奇往事十年書墜
雲車之秘春風說劍每期絲繡平原秋雨挑燈輒
憶珠霏彥國百花綃水中宮闕出龍女之新謠三
生石月裡關山得牛童之舊夢彙非一族集有百
端拈脉望之衣驚逢劍獲啓堯玄之郭欣拾遺聞

臨野堂集 卷四
此皆曩牘之所未登而餘音之所欲奏者矣若夫
睠樹小園曲載寵桃之謗簞錢弱歲猥加賦柳之
誣碧雲駮實敗友聲黑心符奚關世教揮毫成錦
慘卽顛于鑠金濡墨畱蠅疵遂生于玷玉事可鑒
也義無取焉近者讀伏波訓子之篇始悔向人談
過觀德操處時之術允宜卽事稱佳因杼會粹之
衷用補消搖之錄德由潛發故懲寡而勸多道以
邇存詎洪許而纖畧偶倣西齋之記藉耳爲通寧
希東觀之藏寫心則止遙憐松菊從此抽簪漫捲
書詩并當焚硯冠裳委之蠻府聞見黜乎愚溪倘

遇蘓公復有姑且妄言之請願隨巖子應以毋庸
求益之辭

臨野堂文集卷四終

臨野堂集

卷四 序

三

臨野堂文集卷五

吳江鈕 琇玉樵著



序

贈柯翰周舉孝廉序

蓋聞玉樹凌雲秀惟標于仙嶺龍駒追日瑞獨遇
于神陬藍田之高蔭扶疎則璘玢自積渥水之平
沙漫衍則蹠躐將騰材固植之於天寶必生乎其
地是以臧孫忠直爲後人必大之符謝傅風流有
當日欲佳之論芝蘭成於階砌車馬溢於門閭非
盛德之足以傳家詎驚才之出而名世恭惟岸初

先生邑稱魏里夙著雄風地接胥山習聞節概遙
通鶴渚范少伯之湖近對虹橋陸敬輿之宅舊庸
則嚴君司李高閎則皇祖賜綸岳鍾異而生申星
垂芒而肖傅耳聰三湧天表靈姿腰帶十圍人欽
偉幹朱衣奉簡弱冠已列荀班丹陛宣麻崑城遂
臨花縣刑清楚館毳銷畫服之璫澤洽春陵麥滯
甫田之穗張禮羅以得士置信鼓以弭奸市不飲
羊纜凋莫葉村無吠犬屢變葭灰由是札降十行
旣以循良增秩政成三善旋以優異登朝青瑣沈
沈攜阜囊而焚草黃扉藹藹對溫樹而忘言章挾

彈劉汚剪使君之化虎圖披繪鄭困甦下邑之殫
魚眷重兩君時踰二紀式和金鼎嗣膺光祿之司
高踐銀臺隨荷納言之任帳前高弟俱入鳳池門
下舊賓咸登柏府在羣生則先覺于盛世爲多能
宐其亂錫象賢嗣稱踵武魏公之笏接席彌光王
氏之槐盈庭逾茂濯鱗潁水八龍向舞于瑤階振
彩扶風五馬近馳于寶苑慨自光沉荔浦軼仙掌
之雙珠欣此氣射豐城躍秋空之一鶚翰周世兄
青箱授學紫苑資神居有驥子之稱出有璧人之
譽兼以襟期警敏風表閑華追賞南垞荷衣滿座

連情西第珠履成行手不屢又標長吟于縹帙燭
猶餘跋扈細律于銀毫况乎歷楚踰梁遡齊入晉
締交上國攬勝中都咏茅店之雞聲紀蘆江之鶴
夢徵歌亭內河黃雲白之詞酤酒樓前影綠香紅
之曲莫不淋漓旅壁流播行裝乃猶息駕林廬俯
心帖括文义工于射策望早重乎決科維時木宿
登年金祗屆節錢塘激浪交翠柳以颺絲松嶺飛
霞追蒼鴻而結陣冰懸空鑑月戶初開槎發長河
龍門竟渡霓裳二八授法曲於蟾宮犀弩三千退
寒潮於貝闕方撤鎖闈之棘旋騰藥榜之名神助

仲文大曆爭傳湘瑟心疑子固歐陽果獲着仙燒
尾聞雷年爲獨少舉頭瞻日路已非遙祖孫台袞
將登五公四世之榮父子文章孰並三筆六詩之
盛琇結茅邇越樂志尊溪躡屩入燕廁名槐市初
遊太學卽拭目于昌黎繼謁通家遂傾情于元禮
燕喜獲大夫是過不惜題門飄零念孺子之來遽
蒙下榻始與季方聯席因識元方後與子猷並舟
得交子敬假以齒牙之論置之子弟之班絳座重
幃與聞聲伎縹囊秘閣悉覩書籤偶懷負米之私
言歸笠澤復覲炊梁之遇就試鴻都豈期光逸微

材以地寒爲累仲宣薄命以體弱相嗤愧此雕蟲
資其益醬自憐黑貂之做悔入咸陽遙驚白雪之
傳羨生鄢郢雖攀桂之途已隔喜屬心知而泥金
之報乍聞榮疑身受集象牙麟毫之管莫罄揄揚
殫桃花穀樹之箋寧攄篆籀特以依仁歲久用伸
托庶之懷投分情多爰發鳴簷之賀負嵩曷極測
蠡奚從

贈徐道積師魯同舉孝廉序

今使歷丹穴之峯指鷓俱鳳適蒼精之野稱籙皆
龍則谷叟獻嘲必嗤其妄溪賓騰誚且訝其夸嗟

乎愚同右衛徒勤謝室之求神異長房孰解葛陂
之化固難與攬千仞之輝論百斛之瑞矣若其身
依疏圃常觀乘霧之羣家近訶池輒遇噓雲之侶
簫九奏則均儀彩翮樹五花則競吐靈珠又烏能
入薛里而言忘過荀門而默息乎玉峯三夫子弁
冕南州丹青北闕天特生爲民覺帝各命以人師
狎主瀛洲八表仰文章之盛遞司憲府九重識臺
閣之尊于時架滿賜書牀盈傳笏杏江聯步參差
題麟子之名龍節分馳次第出駒王之裔固已家
稠隆典國播美談爰洎道積世兄以碧山哲嗣早

淹博浪之投師魯世兄以紫宇韶英久鬱園橋之
選乃者歲躔強圉節御高商月殿初開仲子踵玉
昆而並入星堂復聚幼公挈金友以偕來計此象
賢已踰五竇媿之獲雋實陋雙丁蓋聞元化權輿
理包清濁大渾亭毒序別盈虛至間氣之獨鍾乃
充閭而并發言其難者厥有四焉世或系承朱閭
性則錢癡蔭藉烏衣躬爲絹僧生於堦城曾玉樹
之無聞授以縹緗唯銀車之屢誤茲則牕鷄獨對
勤逾漂麥之家惟燭爭攜勇敢穿藜之士賦傳魯
殿援管能成詞閱曹碑停驂卽悟其難一也亦有

側弁倚才弱而好弄影纓負氣蕩以相凌書作五
雲不恤別餐之傲醉過八日自矜署戶之嚴茲則
南渚良遊邀仙舟而合棹西園勝集傾子墨而分
毫馮煖雖貧資其彈鋏侯羸已老迎以登輿其難
一也又若粟輸卜式驟膺白版之階恩乞舒祺倖
補黑衣之數馬卿賦能動主不以書升杜甫語必
驚人未由科決茲則曲終湘瑟夢到峯青字易浦
珠神來柳碧懸諸虎榜名高都尉之賤購自雞林
藝貴洛陽之紙其難一也至乃諸葛馳鑣居仍異
國陶丘列牘薦匪同時鷄下鵬高衛氏之一兒獨

別麟優豹劣王家之羣從多殊茲則叶筮雲鴻達
焉共漸稱歌萃鹿笙則偕吹帖報金泥張令公發
僉登之譽籍通瓊笈李都督絕雙舉之嫌其難一
也是維二妙實并四難雀筭花黃報詎誣于陰德
蟻梁筠綠慶畢萃于巍科曲裏夜光已耀昆池之
月殿前朝彩將飛太史之雲古未聞諸今其觀止
余也孤跡生吳壯齡遊洛流落三千之器以鈍成
材棲遲七十之門惟貧受命求師傳於壇杏因入
鴻都結世講於園桃每登珂里托三珠以自蔭追
兩驥而奚從愛景融之擅名更懷景倩喜知玄之

擢第欲畫知騫洵哉翩翩梧岡響必合于岐鳴之
世鬢鬢茆渚見不孤於軒紀之朝請依乾符髯白
之郵稱斯盛事擬設興慶綾紅之讌貽爾嘉賓

贈王呂崖之任祿豐序

九霄宮殿日臨籟俊之天六幕圭璋星指酬庸之
地市登神駿臺築黃金沼咏嘉魚河流白玉芙蓉
鏡下紛紜釋褐之夫鳩鵲觀前絡繹分符之吏窺
其名位孰非屬毛離裏而來責以綱常豈止從政
服官而畢也廼有家起殺傭人稱絹僧幸乘漑粟
之階乍入牽絲之侶崢嶸白版方啻擁篲於乃翁

偃仰青袍莫問蒸梨於爾室當夫蠹將化蜨唯思
捧檄爲歡縱使莪已成蒿寧解廢詩而讀似茲噲
伍無待雄嘲至若裔出高閎榜推上第學嫺縉素
望著衣冠然或攬轡違都建綏越國寄書則峯遙
落雁發使則信杳鳴駝險遇王陽殊少欲迴之馭
榮加溫嶠偏多可絕之裾洎乎缺驥難追明膏易
盡隧而求見終迷闕地之期養不逮存永斷倚雲
之望悲可知矣悔何及乎我友呂崖王君性府篤
純詞源斐亶擅貽舊物守伏勝之一經管發新花
成杜陵之三賦未踰綺歲才擅雕龍旋掇巍科名

畱題雁南宮揆藻戶抄傳洛之篇東閣影纓廷擬
登瀛之選於斯時也洵有情焉自念貧而失恃已
空銜嚙指之悲壯始成名可無慰介着之樂蕭蕭
征騎竟息意於金閨淼淼歸帆仍取途於石柱徑
蜚蒼雪孝筍環生門繞碧嵐壽松孤峙毳羶畢備
晨餐之度閣無虛牀第怕疎夜卧之抑搔必謹薰
風郊墅手掖籃輿良月盤卮足隨藜杖懷瓜鄰社
無殊童穉之年攜豆賓筵自執獲臧之役未幾嚴
君方臻耄耄每二豎以交侵唯暨伯兄互侍寢興
至十暮而弗輟甚則齋宮請代刲股鳴哀溷廁親

除浣淪致潔無何藥題無驗龜兆不從痛忽摧心
血罄臯魚之淚毀幾滅性丹枯和嶠之顏醜粥伏
苦練祥縱縱結廬依墓風樹悽悽蓋左右無方率
皆動而中禮始終匪懈直可移以作忠試問之赤
芾班聯此日誰爲曾閔乃求之烏衣門巷伊人復
見褒祥猶憶數稔以還偶探雙鐘之勝有懷夙好
曾訪幽棲當高堂強飯之辰正賤子端憂之候俄
驚改燧藐爾凶同比及彈冠翻然旅合余來燕市
相逢感慨之鄉君造滇池又作別離之客因陳昔
夢以永今朝一縷蒼山將尋萬里入雲之路三更

紅燭恰值九秋話雨之時更有得於竊聞敢以告
諸執事孝能施政載自簡編仁在篤親訓由聖哲
以庭闈之悃幅爲民社之經綸苟舉斯心卽優於
學尚憑鷺堠預占喬舄之飛聊藉魚牋用代虔刀
之贈

送程姬田南還省親序

一鴻送臘寒雪千門三豕紀春香塵九陌當帝鄉
改歲之時正客子離居之候爰有詞伯尚爲選人
溯其先喬實並紫陽瞻乃高閎原依白嶽將結桃
花之綬跡寄神京偶參貝葉之文心憐佛日竭來

旅舍共託禪關若夫磬發簾疎香聞榻靜通書籤
於隔院互答吟聲移酒盞於殘筵更申醉約紅鑪
促坐語禪嘲詼素練分題義窮商榷旣而天街爆
竹人海鬧蛾月湧璧而輝清星橫橋而彩散瓊簾
隱霧迢遙七寶之宮錦幕凝烟窈窕千花之鏡於
時側帽遊酣聯綦歸緩林蟾欲墜驚階荇之交流
篝麝猶溫誇路鈿之競拾欣斯良邁暫豈類乎班
荆暢以佳辰悲無勞於擊筑也廼者續紛點藥信
報梅郵睨睨遷音候催鶯乳妯田程子頻歌東雨
輒憶南雲草曰忘憂色乍沾於萊服山云陟屺道

尚阻於潘輿亟命鶴裝旋聞驪唱室蘭可佩方占
如臭之爰欄藥初看忽製將離之賦嗟乎倚劍論
交易獲許身之俠絕裾求仕難逢望舍之賢欽彼
瞻依懷茲契濶睇吳門之曳練羨伊人獨返吾鄉
念燕館之築金知後會仍來此地

徐母顧太夫人六十壽序

蓋聞巒岡縹緲非培塿之觀川瀆逶迤豈汀滯之
發是以千尋丹壁脈必始乎崑丘萬里黃流源必
由乎宿海矧乎人稱爲瑞茂徽音于申甫之家天
鍾其靈誕哲嗣于竇荀之府斯慶流彤管從致期

願而德邇榮椽能忘頌禱恭惟太夫人體侯名族
室擁書堆洛俊高門座揮羽扇曹大家之藻采搖
筆生花桓少君之風標歸轅繫鹿由是適柱臣之
裔儷酒聖之孫緝洸爲勞未辭龜手卮盤惟肅常
對鴻眉雄豪北海之尊咄嗟而辦磊落南州之駕
鼃勉相從因之兆叶懸鈴瑞發四旗之夢禮殷截
髭譽成八翼之賢珠益星輝共標珠樹鳳池日麗
爭構鳳樓首占太史之書雲生五色繼赴曲江之
宴花插雙枝世俱號以神仙帝乃尊爲師傳燕臺
秦嶺登南琛北駿之才虎觀鴻都擅東壁西園之

座齊山碩望少室與太室分奇射斗鴻文上台與
中台偕秀以是臺名玉鏡得秘閣之舍人階挺瑤
林識皇衢之國士此皆九熊示訓畫荻貽書萬石
家風實由懿幄三槐世澤爰等流波宐其昌熾方
來神降麒麟之種康寧永錫曆增蚪蚪之編問齒
則梅甲初週賞心而萱憂早釋於時惠風習習淑
景遲遲酣萼揚芬林織絲人之錦慧鶯薦響山鳴
嶰谷之簧榆蔭雕甍綴碧錢而貫影蘭周瓊砌紉
紫佩而垂紋辰旣云良家斯具慶板輿同御羣瞻
冠冕夔龍鳩杖相扶爭羨壘篴元凱宮袍披繡縫

自神針禁燭颺輝化爲異彩歸金昆于珂里爛斑
舞萊子之衣望玉友于蓬山迢遞獻陸生之橘爾
乃聲騰椒掖典出藻宮絳帳談經久賜宣文之號
彩鸞授詔特封臨振之鄉湯沐金錢頒由內府茱
萸珍餌法用上方于是職列鴛班各致登堂之拜
系通蘭牘盡隆酌酒之儀內則桐葉之侯沙隄之
相採芝嶺首四皓交書吠犬雲中八公歛戶瀛洲
學士箋標小碧之吟粉署郎官函致大丹之訣木
天窈窕靜能之桂杖遶飛金馬逍遙曼倩之桃觴
忽至外而柔嘉方牧月樓添變海之籌宴喜大夫

棋墅呈爛柯之局朱幡翠葆旋迴控鶴之車墨綬
油幢遙墜飛鳧之舄尹來勾漏競進丹砂尉返柴
桑爭陳菊水若夫上都才子中谷幽人乘鳳而出
雲間懷蛟而至日下芙蓉在腕敲柳瘦以摘華琬
琰爲心披松鱗以濡翰淋漓銀筆無非盛德之詞
稠疊縹囊悉是長生之句別有滄洲螺客捧絳雪
而來遊祇樹鴿王坐青蓮而下謁霧綃披拂珠絡
飄颻降授錦之天孫霜凝繭甕集鳴璫之帝女雨
染花臺是則日月壺中星河槎上旣家傳洞府亦
人識靈源錯落珠璣第宅滿三千之履輝煌錦紫

檻屏置七十之帷乃肆芳筵復陳衆樂餌膳則杵
霜研乳成王烈之香膏鼎俎則蒸蕙燃莫行麻姑
之麟脯霓裳星珮按妙舞而乍迴鳳管龍絲雜織
歌而並作塵成白玉十斛猶賒釀出青田千辰未
醒求之天上瑤水仙姬之讌誰與爲倫顧此人間
魯邦壽母之年未有其盛琇以誼深御李地近恭
桑童子何知驚逢椿歲大人有賦喜謁龍門值名
世之引年序初筵之介福遇同啖蛤技等雕蟲譬
猶量晷添絲難測岡陵之算望洋酌蠡詎成河漢
之言聊因汗漫良遊飫心有莫庶幾揄揚盛事綏

履無疆願寶婺之長輝瞻銀臺而申祝用歌難老
以誌忘歸

徐大中丞立齋夫子壽序

粵稽龍紀之朝爰及麟遊之地虞門永闢自來熙
載之良魯鐸遐聞不墜微言之緒是以七十子而
後固有傳人五百年以來非無名世若乃遠紹聖
賢之統近弘邦國之光旣模范乎羣工亦羽儀夫
諸彥則有教秉素絲爵膺蒼珮駐金輿而受易几
杖人師躡珠履而聞詩門牆胄子鱣堂四啟乍變
鴉音虎席九重更摧鹿角昌黎進學之解下逮莊

騷安定治事之齋上同鄒魯維洪都之峻秩實鷺
序之崇班繼而芍藥欄邊毫揮寶硯蓬萊池畔鱗
縷冰盤寵每溢乎錦袍位乃高乎玉署承明視草
滿攜香案之雲崇政說書緩步花磚之日居鄭網
久次之院領袖羣僊登宋祁最上之峰提衡庶吉
非擅三長之雅孰躋兩制之尊今也列戟南司正
繩左轄坐而尚席巍鐵柱以成冠行必分鑣麗繡
紋而作服點染則風霜凜栗咳吐則山岳動搖清
路彤騶陪輦鳴八鸞之後高岡彩鳳封章飛百鸚
之先光華近接夫太微威烈直侔乎台輔此尤深

歷圖書之秘總持臺閣之綱者矣伏惟老夫子神
自嶽生忠由帝簡負兩朝之望稱四海之宗數人
間甲子之週僅盈其五論天上清華之選已陟其
三令望令聞願筮大人之吉善頌善禱非稱君子
之年請測以私敬陳其概原夫舞雲化鳳產于孝
穆之家圍玉名峯居則士衡之里牀中翠管勇敵
五丁架上牙籤富探二酉擅無雙之譽慧質清標
奏第一之書韶齡高舉才更多于子建名不假于
士安挂藝海之珊鈎瀾迴潘陸植學山之瓊榦壘
墮班揚左梁丘而右夏侯仍窮搜夫汲冢前廬陵

而後涑水亦尚遡夫龍門出阜囊百八之章草搖
無佞署綠笈五千之字蠹食猶僂兼之永日百函
烏絲盡麗數行一紙青李偏工昏壁畱題碧紗遍
籠乎蓮社華牋傳寫銀榜遠購乎雞林於焉雜組
燦而管蒯失光巨鏞旬而缶竽息響魏家驚蝶忘
佻質于咀英劉氏疥馳化拙形于披藻闢異之功
斯在起衰之責攸歸是曰立言河漢之言也至于
師從黃石胸具甲兵業受青緗手抒機緯啟將軍
之武庫非止工詞佩尚父之陰符詎煩橫槊引儀
鹵簿肅仗下之飲飛秩禮容臺屏殿前之綿蕞冰

衡撤棘風採秦翰玉帳翹關士收燕駿彈夏州之
節度膽落權豪薦般邑之狂生看揚側陋加以內
參密勿外贊機宜消烽燧于八閩定戈鋌于六詔
投尺組以擒孟獲膏斧滇池馳寸簡以讐趙佗發
弓粵海用是泮宮獻馘樂府歌鏡從容尊俎之謀
檄成諭蜀指顧河山之險表著平吳况乃道弗之
區結總並服人奴之役牛馬同關奚有春藁之傷
吏有逋租之困無不形諸辰告制以良規王褒之
僮約長捐倪寬之賦車永息是曰立功日星之功
也至若性府篤誠道型端重托襟期于月霽比晏

笑于河清竹筍菁菁感因孺慕棣華鞞鞞誼切友
恭潘岳輕軒更侍綵衣八座姜肱大被不離珠樹
三枝撫錦祿之孤甥宅爲相貴陋黑衣之賤息庭
有象賢且也忠恕常存安危自任思而待旦深懷
聽鑰之勤事可告天早釋負衾之愧苞苴載道無
由入叩巖鈴槐柳成行莫敢進依寒鐵洛中廝養
遙識高名海外戎王爭瞻雄表乃復解駮好義倒
屣鳴謙席容脫帽之賓車載吐茵之吏碑摹薦福
屢拯厄于貧交賦袖阿房最銜恩于國士下而蟻
窟審雨架以筠梁雀病翻風藏之中笥家失海鷗

之蓄不問飛銀路逢靈輒之饑特令饋食澤靡弗
逮亭毒之所不踰善有必爲圖緯之所莫紀是曰
立德岱嵩之德也服彼袞章樹茲鴻業所謂曾顏
軒冕天爵相從夔離鼓歌人綱獨振距衛公之箴
酒尚在中齡方崔令之吟花未如高第盡人稱爲
次相舉世望若登仙又奚俟遊侶赤松歷鰲峯之
十五信傳青鳥報桃歲之三千也哉門人琇近托
扮鄉夙依絳帳執經座下受知孰並何蕃捧檄土
中求仕真同毛義當項國辭簪之會正尼山繫紱
之辰是月也金韞示肅碧灑敷涼飛書聞錫筮之

臨野堂集 卷五
榮雲迴鸞紫醉閣想影纓之盛霜染楓丹顧下吏
以塵遙幸長安之日近輝輝南極何須求積石之
芝采采東籬尚得獻歸田之菊閱十年而歌有覺
初見添籌隔千里而祝無疆再逢珥筆

王大中丞印周先生壽序

側聞象垂含譽光必燭乎泰階律協歸昌響自傳
乎神岫龍圖五十俟轅帝而游河桃歲三千金瑤
姬而著籙然則物華告瑞不當愛寶之朝人傑鍾
靈獨在颺言之代况夫吹笙棲嶺本號僊家剪髭
開筵還逢聖主金埒則譽聯山魏珠標則才軼盧

楊起江左之夷吾再稱名世問河汾之夫子重見
真儒此尤系襲烏衣陟三台而獨峻聲侔赤舄邁
十部而先馳者矣伏惟某官智府瀾澄映璧輪而
遐照範圍岳峻挺瓊榦以高扞家藏孔氏之簪閤
文特麗座懷陸生之橘至性偏純由是鶴翥靈沙
桂芳傑閣綾餅曲江之宴通籍英齡香鑪侍史之
班試箋華省自爾星催夙駕竹判行符破碧浪於
蘆江磯攀燕子品縹瓷于茶社巖對梅花虞衡之
掌攸專陶正之功亦最加以時平玉燭野息琯戈
命德自天服五章而三錫簡忠在帝秩一歲而九

遷孰分前席之榮遂歷中臺之任東西二陝畢公
得地何尊內外兩河寇君稱侯獨早數洪庥于疇
昔宐弗祿于今茲願祝維祺爰稱旣備若夫座開
絳帳高弟相隨車滿玄亭奇文共賞網珊瑚于藝
海筆吞雲夢之聲拔杞梓于詞峰席引衡廬之色
滕王一序家傳畫棟珠簾泰伯五經人奉緹囊金
板集扶輪之羣力大雅攸歸懸望斗之鴻名衰文
斯起斯則以言壽士厥壽一也爾乃簫鼓中流浮
舟入洛檐帷上郡握節巡梁祠謁媧皇近借補天
之石碑看啟母早懷平地之圭用賈策之三敘箕

疇之一桃花春浪無勞沉璧瓠宮竹槿秋風不待
運斤淇澳問津牛渚信通博望之槎疏派龍門怪
息祈支之鎖斯則以績壽土厥壽一也及乎振霜
稜而持憲司雲紀以流膏海嶺望秦目驚斯酷江
潮聽越心識胥寃五夜燃燈屢輟爰書之筆三年
零雨預高陰德之閭墨綬懲汚柙虎爲之不翼赭
衣宥青竿雞因以常鳴鞠茂草于園扉桁楊欲卧
陰甘棠于芟舍履踊無謠斯則以法壽人厥壽一
也旣而復涉珠湖載登錦谷舳艫千里牙幢仰節
使之尊鎖鑰百城銀信寄籓侯之重元規樓外卽

有錢倉太白堂前非無米市儲胥爲計遵關石之
書平準是資陋算緡之術朱提鵠化譬園府之泉
流赤仄螢飛識大庾之貫朽斯則以財壽國厥壽
一也似茲道隆兼善皇哉邁跡熙朝功懋克勤允
矣壯猷元老是用衮衣遵渚遂升獨座于中天棨
戟環門載拜羣僚于塵後然猶虛懷接物大度容
人詢必逮夫芻言照能周乎冰鑑急桑田之課則
星未盈原弛酤權之征則風檣連岸奏復貢金之
粟飛輓不因蕭車議分錯壤之鹽懋遷實踰管策
洪惠與汴流偕潤令聞與嵩嶽爭高莫茨纔零臺

萊之吟遍野葭灰未變琬琰之碣干霄維時融旭
馳輪炎雲聚彩辰逢初度會紀太和當浮瓜雪藕
之時正酌斗懸弧之候指河山之四塞帶礪何遙
著道德之千言圖經非妄將見丹書入告楓陛徵
庸瑞叶佩刀寵升台鉉斯則以德壽世厥壽無疆
寧止羽翼銀潢採商芝而誇俊偉鼓吹石室錫韋
谷而號逍遙云爾哉琇也蘆中小草涔內微鱗長
安杜曲之遊名慚居易太學槐街之選齒借昌黎
于焉業廢操觚情縻捧檄披頓山之灌莽守項子
之彈丸雀可羅庭魚常生釜所幸廕加幃幄仰鵬

息之垂天誼切粉榆惜鷄飛之決地雖依光于暮
月實等貺于岡陵化黃衣之公子難酬巾笥之恩
求白衛之真人長進琅函之訣已辭勺漏無由購
彼丹砂將返柴桑卽此獻同甘菊

吳母徐太孺人壽序

釣鱸渚畔長浮少伯之舟鬪鴨欄邊夙構龜蒙之
宅琅玕漾碧西園則曉露千尋擺極翻紅東畝則
夕陽萬頃吟鐙寂歷書籤與藥裹俱封遊屐流連
茶竈與筆牀並列其間有畸人焉其人也家本延
陵才如季重勝衣揆藻人稱楊柳之年束帶歌芹

籍寄鴛鴦之水門盈蘭棹揮珠之仙客頻過室秘
璇題吮粉之畫師畢集然而業生自慧早與貝葉
爲緣境悟原空晚更竹林是倚閭丘眞骨獨秀銅
梁孝穆綺情終販寶誌遂乃棲心鹿苑距跡雞牕
坐或十年齋常一月攜尊入社每過惠遠之橋濡
筆題碑多在頭陀之寺何爲華胄忽爾禪逃凡此
淨因良由孝感蓋以堂前萱茂種分蒼筍之花池
上桃開信報迦陵之鳥實惟壽母六時祇禮空王
亦越象賢一體願依慧日乃者七旬悅設百福奩
開太君正青鴛繡佛之辰令子亦白雀飯僧之會

請於鶴林梵夾唱彼徽音假以龍藏曼華宣其嫺
德昔孺人之歸我彥康先生也鳴璫佩蒞裔衍駒
王習禮明詩訓從麟母眉齊鴻案姑嫜訝德曜之
拱手御鹿轅媵婢遜少君之儉雞聞四野杼軋軋
而先鳴蛩語三更緯蕭蕭而金絡維時擗擋魚竹
已非菊松三徑之貧緯繡琴尊具有烟月五湖之
樂未幾蒼鶩乍出青犢爭驅豪客之船晨書飲鯉
妖王之廟夜火吹狐矢交苧粟之區漸危錦里旂
播桑麻之野旋擾花源孺人則謀協女宗誼聯家
督傾珠籛之百琲壯以千椒散綺篋之千縑供茲

保障田單宗族鐵籠轄而俱全陳實鄉閭星聚堂
而無恙况也歲不金穰村非穀熟浸扉及半鷗竟
泛以爲天沈版餘三蛙欲鳴而何地路攜糠婦誰
許其肥市指醉人咸驚其瑞孺人則力請發倉心
工算廩翳桑病卧壺貽趙氏之餐公瑾來遊困贈
魯公之粟釜塵飛處都成舉火之家戶柳垂時可
廢禁烟之節此固惠流苦海寶筏之所莫踰功照
昏衢金繩之所莫限者矣若夫鍾阜森森度稱四
謝洛川雅雅嘏說三劉樹無別于同枝孕仍分于
異璞孺人鳩桑不二蘆絮奚單出慈線于手中裁

爲大被題鞞華于樓上勉以連輝過庭則俱日文
豪劣猶虎豹遶膝則並云家瑞叶似填窟猗與季
子尚翔龍尾之鱗藉甚幼公更煥鳳毛之彩看此
日青蓮鉢滿悉貯同人多福之謠俟他年彤管編
成定採吾輩長生之頌

孔母徐太孺人七十壽序

自夫風采梁鷦家膺赤芾秩加軒鶴人廢青箱范
子算魚位遂躋於上相馬卿潔粟名竟徹於深宮
於是揆藻之英盡登炊蠟沃飴之館曳珠之彥爭
扶馭脂削脯之輪飾譽慈闈則高援彤管矜陳嘉

祉亦遠假丹丘清築秦臺擬曰西池王母嬖歸樊
室稱云南嶽夫人旣莫嗣乎徽音復甚慙乎華胄
而揚茲婉孌侈以神仙斯固班史以爲污謝庭之
所鄙矣若乃東國麟遊玉書吐聖人之里南州鳳
集寶誌題才子之門族最勝於區中風更高於林
下况乎峰迴勾曲本號仙都洞接華陽原稱福地
又何能不向銀臺而儀禴翟探金策而頌岡陵乎
如我孔年伯母徐太孺人者副憲見輿公之曾孫
女相國文忠公之冢孫婦而明經傳巖公之淑配
也瞻烈祖於高閔則先生烏府嬪文孫於碩裔則

元老黃扉幼擅女宗已著椒蘭之譽長辭師氏自
嫺纂組之工甫踰織素之齡遂叶卜凰之慶門風
獨秀俱待成於宣座紗籠神明不衰曾無假於甘
潭菊水恭仰母儀允宜得壽請言其槩厥有多端
爾其家寄千峯人分兩地疊玉爲巖迢遞眺葛溪
之杏飛花成堰逶迤聽茅嶺之松少保致政以還
旋營別業中翰抱孫而後尚侍高堂太孺人相莊
淑慎奉養徽柔粧妝遙通禮無殊於定省琴瑟在
御情彌切於瞻依且也脫釵以佐夫君鳴杼而先
僕御縹緗晨席常連吟蟀之昏絡緯宵燈每達聞

鷄之旦文壇詩壘蔚有英聲柘館麻池秩無廢政
則處豐似約其志貞也洎乎秦鹿走原漢駝卧棘
望屋而歎烏棲過都而歌麥秀文相之殉玉塞忠
逮攀髯卞公之歿金陵義同伏劍幸盱眙之猶存
恐褒融之漸及太孺人倉皇避地展轉攜孥賃廡
而居孰識着齊之案浮牛而渡如逢冰合之河維
時堂摧晝錦徑冷平泉野屯梳篦之師邑起萑苻
之寇車驅廣柳收細弱以還鄉詩咏蓼莪奉姑嫜
而依墓饘醜黽勉上佐槃匱松菊棲遲重開衡宇
則遇險如夷其神固也至乃喪亂旣平飄搖甫定

尚鳳林之舉燧忽鯨海之揚波悍帥興戎責以獻
韋之役叛奴告密誣爲藏甲之家處處危途年年
繁費太孺人課行官以供賦輟食箸而運籌僮約
屢申輸餉入千畦之稻獄文潛息傾篋散百琲之
珠始也謝家門巷無改巢燕之常旣而田氏宗支
竟免林猿之厄則智以保族其謀長也若夫蘭堂
雁序懿如鍾郝同行藻闢棠花貴若譚邢異戚或
先榮而後瘁或初合而終離問羹廚下妯娌生契
濶之思牽犬閨中娣姒起貧傷之嘆太孺人情殷
任卹誼切周通自爲丘嫂從無轢釜之譏顧彼諸

姬每授蒸梨之訣慕親同於石窠厝以幽宮憶妹
及於鍾離資其雜佩論勞論逸惕鄰女以片言知
廢知興邁哲人之先見則仁以睦親其量裕也詎
期十年荏苒再世凋零旣椿殞于高林復鷄摧其
比翼君子入仙遊之遠夢元嗣示瞑化而長辭堂
上斑筠淚枯萬點庭前嘉樹玉倚三枝太孺人垂
髮居憂丸熊式誨茹荼集蓼偏彰持戶之能習禮
明詩不懈過庭之問煎心膏而課史已成孟博之
名寄手澤而授書尤勉季方之學箋飛燕市唯令
惜日爲箴郊御魚軒未許閑居作賦則義以垂訓

臨野堂集 卷五
其識悠也似茲備德乃永延純嘏之方俾爾長生
正盛享遐齡之始歲逢豕渡星紀火流當六幕之
報讖適七旬而設悅令子竹巢年兄才踰八斗炳
繡虎於藝林書擁百城翱翔鸞於仕版將捧毛生
之檄用成萊子之衣爰自幼冲迄於耆艾仿史家
之紀事循親舍以編年紺色神珠光搖京邑綵文
真籙悃溢鄉閭以此烟霞顧陸各傳金粟之圖冠
冕夔龍共發銀毫之頌參差繡牘蒲萄之錦千重
縹緲瑤笙菡萏之峰百丈無不覽茲慶羨罄以揄
揚琇也上國旅人通門猶子諧實分於蘭蒞地遙

接於枌榆心依闕里之堂願聆絲竹躬邁建安之
客常對尊罍唯深契夫象賢固稔知乎內則因從
鳳城染翰并陳勾漏之丹砂尚俟蓬島添籌載進
靈威之璫笈

臨野堂文集卷五終

陸聖堂集

陸聖堂

陸聖堂



